

钦定四库全书

集部五

鐵崖古乐府

别集类四

元

提要

（臣）等谨案鐵崖古乐府十卷乐府补六卷元杨维桢撰其门人吴复所编维桢以乐府擅名此其全帙也乐府始于汉武后遂以官署之名为文章之名其初郊祀等歌依律制诗横吹诸曲采诗协律与古诗原不甚分后乃声调迥殊与诗异格或拟旧谱或制新题辗转日增体裁百出大抵奇矫始于鲍照变化极于李白幽艳奇诡别出蹊径岐于李贺元之季年多效温庭筠体柔媚旖旎全类小词维桢以横絕一世之才乘其弊而力矫之根抵于青莲昌谷纵横排奰自辟町畦其高者或突过古人其下者亦多墮入魔趣故文采照映一时而弹射者亦复四起然其中如拟白头吟一篇曰买妾千黄金许身不许心使君自有妇夜夜白头吟与三百篇风人之旨亦复何异特其才务驰骋意务新异不免滋末流之弊是其一短耳去其太甚则可欲竟废之则究不可磨灭也惟维桢于明初被召不肯受官赋老客妇謠以自况其志操颇有可取而乐府补内有所作大明饶歌鼓吹曲乃多非刺故国颂美新朝判然若出两手据危素跋亦即聘至金陵时所作不知何以乖谬至是核以大义殆不止于白璧之微瑕矣

乾隆四十六年正月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●题杨维桢鐵崖古乐府

杨维桢于元仕不显而不肯仕于明似为全人矣而其补集中有大明饶歌鼓吹曲非刺故国颂美新朝非真全人之所为与剧秦美新何以异耶予命为贰臣传于钱谦益之既仕本朝阴为诗文诋毁常恶其进退无据然谦益之所毁者本朝犹稍有懷故国之心若维桢则直毁故国较谦益为甚夫文章者所以明天理叙人伦而已舍是二者虽逞其才华适足为害不如不识字之为愈也若曰惧明祖之强留而故为此逊词以自全乃明哲保身之计予谓明祖直未强留耳若与之官将亦必受之何也以其忘故国而知之危素跋而赞之蓋亦同病相怜曲为之解耳因着此论并命録其集前亦所以教万世之为人臣者乾隆戊戌孟夏

●铁崖古乐府原序

三百篇而下不失比兴之旨惟古乐府为近今代善用吴才老韵书以古语驾御之李季秋杨廉夫遂称作者廉夫又纵横其间上法汉魏而出入于少陵二李之间故其所作古乐府词隱然有旷世金石声人之望而畏者又时出龙鬼蛇神以眩荡一世之耳目

斯亦奇矣东南士林之语曰前有虞范后有李杨廉夫奇作人所不知者必以寄余以余为知言者抑余闻咏歌音声之为物明则动金石幽则感鬼神岂直草上风行之比哉廉夫遭盛时扬言于大庭者也将与时之君子以颂隆平乐府遗音岂宜在楚要使大雅扶世变正声调元气斯为至也余不敢不以此望于廉夫余子不足语此至正丙戌冬又十月方外张天雨谨题

君子论诗先情性而后体格老杜以五言为律体七言为古风而论者谓有三百篇之余旨盖以情性而得之也刘禹锡赋三阁石介作宋颂后之君子又以黍离配三阁清庙猗那配宋颂亦以其所合者情性耳然则求诗于删后者既得其情性而离去齐梁晚唐季宋之格者君子谓之得诗人之古可也会稽铁崖先生为古杂诗凡五百余首自谓乐府遗声夫乐府出风雅之变而闵时病俗陈善闭邪将与风雅并行而不悖则先生诗旨也是编一出使作者之集遏而不行始知三百篇之有余音而吾元之有诗也复学诗于先生者有年矣尝承教曰认诗如认人人之认声认貌易也认性难也认神又难也习诗于古而未认其性与神罔为诗也吁知认诗之难如此则可以知先生之诗矣先生在会稽时日课诗一首出入史传积至千余篇晚年取而读之忽自笑曰此岂有诗哉亟呼童焚之不余一篇今所存者皆先生在钱塘太湖洞庭间之所得者云至正六年丙戌春三月初吉门生富春吴复谨拜手书

铁崖古乐府原序

●钦定四库全书

鐵崖古乐府卷一目錄

履霜操【并引】	别鹄操【并引】
雉朝飞【并引】	精卫操【并引】
石妇操【并引】	湘灵操【并引】
箕山操	独禄篇【并引】
公无渡河	桓山鸟【并引】
乌夜啼【并引】	野雉词
旦春词	系子词
眉妩词	结袜子【并引】
栢谷词	鸿门会
紫芝曲	金台篇
吴钩行	臙脂井
平原君	春申君
聂政篇	易水歌【并引】

已上凡二十六首或述古乐府旧事或补古乐府所缺上至精卫之古愤下及刺客之悲歌而美刺存焉劝戒彰焉读者有所感发则事父事君而天伦无不厚矣复识

●钦定四库全书

鐵崖古乐府卷一

（元）杨维桢 撰

履霜操【并引】

琴操有履霜谓尹吉甫子伯奇为后母谮而见逐自伤而作也其词曰朝履霜兮采晨寒考不明其心兮信谗言何辜皇天兮遭斯讐痛歿不同兮恩有偏谁说顾兮知此冤使是词果出伯奇则伯奇不得希于舜矣余为之补云

霜鲜鲜兮草芟芟儿独履兮儿宿野田衣荷之叶兮叶易穿采葶花以为食兮食不下咽嗟儿天父兮天胡有偏我不父顺兮宁不儿怜履晨霜兮泣吾天

别鹄操【并引】

琴操有别鹄操谓商陵穆子娶妻五十无子父母欲其改娶其妻闻之中夜悲啸穆子感之而作是操也

雄鹄于于雌鹄舒舒两鹄比翼其巢同株五见树叶荣而枯嗟尔比翼而不生雏比翼将乖雌雄羈孤中夜雌啸雄将曷如宁为不雏死作两孤不愿八九子为秦乌

雉朝飞【并引】

琴操有雉朝飞多指牧犊子之作据扬雄所记则曰雉朝飞者卫女傅母之所作也卫女嫁齐太子中道太子死问傅母傅母曰且往当丧丧毕女不肯归终之以死傅母悔之取女所自操琴于冢上鼓之忽有雉出墓中傅母抚雉曰女果为雉也言未毕雉飞而起故其操曰

雉朝飞予以牧犊之叹不如卫女之善死有关世教也故赋以补旧乐府之缺云雉朝飞一雄挟一雌雄死雌誓黄泥归卫女嫁齐子未及夫与妻青缙绶素结一死与之齐人言卫女荡且离乌得冢中有雉飞琴声鼓之闻者悲

精卫操【并引】

按述异记昔炎帝女溺死东海中化为精卫鸟日衔西山木石以填东海怨溺死也余悲其志为作精卫词入琴操云

水在海石在山海水不缩石不刊衔石向海安口血离离海同干

石妇操【并引】

石妇即望夫石也在处有之诗人悲其志与精卫同不必问其主名也予为词补入琴操云

峩峩孤竹冈上有石鲁鲁山夫折山花岁岁山头歌石妇行人几时归东海山头有时聚行人归啼石柱石妇岑岑化黄土

湘灵操【并引】

博物志舜陟方死于苍梧二妃死于江湘之间俗谓之湘君湘旁有黄陵庙事虽不经而楚词于九歌有湘君湘夫人之辞故余亦补入琴操云

湘之水兮九支湘之山兮九疑皇一去兮何时归攀龙髯兮逐龙飞生同宫死同穴
招皇衣兮复皇辙九疑水九疑山九疑辙迹在其间望飞龙兮未来还湘之淚兮成水湘
之石兮成斑

箕山操【与复古诗集稍异】

箕之山兮可耕而樵箕之水兮可饮而游牵牛何来兮饮吾上流彼以天下让兮我
以之逃世岂无尧兮应尧之求吾与尧友兮不与尧忧

独禄篇【并引 引与时刻异】

古乐府独禄篇为父报仇之作也太白拟之转为雪国耻之词予在吴中见有父仇
不报而与之共室处者人理之灭甚矣为赋此词以激立孝子之节云

独禄独禄恶水浊仇家当族孝子免污辱孝子躯干小勇气满九州岛拔刀削中睨
父仇父仇未报何面上父丘漆仇头为饮器雠仇肉为食噉头上之天纔可戴

公无渡河

公无渡河河水深兮不见泥公身非水犀鸟风黑浪欲何济公不能济横帆在河西
青头少妇泣血啼有年不死将谁齐公死河灵伯妾死河灵妻

桓山鸟【并引 鸟一作禽】

古乐府有上留田行上留之地有父死而兄不字其弟者邻人为其弟作悲歌以风
其兄南俗兄违父命而虐其庶弟于父死之后者往往有焉故赋桓山鸟以继上留乐府
云

桓山鸟鸣声一何悲严父戒二子分财无嫡支父死未葬命一遗两枝荆华摧一枝
呜呼桓山鸟鸣声实堪悲死隔别生流离百鸟闻之为嗟嗟

乌夜啼【并引】

古乐府乌夜啼者宋王义庆妓妾报赦之词予为补之而少见规诫之义云

笼葱高树青门西夜夜栖乌来上啼报君凶报君喜愿君高树成连理啼乌夜夜八
九子莫使君家高树移乌生八九乌散飞【夜夜一本作夜生】

野雉词

野雉异兮家鸡雉将雏兮栖栖嫁刘季兮逐季飞不逐季兮季狐疑羽翼成兮两口
苦无违

旦春词【一作人彘怨】

儿为王母为囚旦春莫春无时休天高地厚日月流母苦不得从儿游汉家谋臣张
留侯老人立致商山头君王轻信羽翼愁十年身后知安刘髡钳之人何以留

系子词

车驱驱邓家孥长绳系野树小儿泣呱呱泣呱呱父一顾可奈何弟兄在手不可俱
父再顾眼血枯行人断绳走匍匍

眉怆词

朝画眉莫画眉画眉日日生春姿长安已知京兆恂有司直奏君王知君王毛举人间事不咎人间夫妇私

结袜子【并引】

古乐府有结袜子大抵言感恩重而以命相许也太白拟之亦然余以结袜子属张释之释之天下称贤故予为是词补入乐府云

汉家九陛飞秋霜公卿会立朝明堂王生何人谈老黄廷辱廷尉理不当廷尉跪结袜有如壮夫出胯下面无惭色神洋洋君不见黄石公进张良夏侯章低孟尝长者之名从此扬

栢谷词

栢谷险君勿趋君一趋龙为鱼浆长岂识真龙躯莱尔老妇能挽夫论报不赐诛浆长本无辜举之羽林郎大将军可奴

鸿门会

天迷关地迷户东龙白日西龙雨撞钟饮酒愁海翻碧火吹巢双猊■〈彳 俞〉【暗言范增项庄】照天万古无二乌残星破月开天余【此言沛公当独王天下羽不得分也】座中有客天子气左股七十二子连明珠军声十万振屋瓦拔剑当人面如赭将军下马力拔山气卷黄河酒中泻剑光上天寒彗残明朝画地分河山将军呼龙将客走石破青天撞玉斗

紫芝曲

商山巍巍上有紫芝采芝可疗饥何独西山薇西伯养老去古远而独夫杀士吾将畴依邠金之子海内威罗络齟齬【音蚁纆】将奚为平生不识下邳儿肯从汉邸同儿戏禄里绮里无人知

金台篇【一作黄金台辞】

高台起朔方金色照天光上有七十二凤凰金鼎玉食高颀颀王不居志独苦拜师礼重心愈下羣贤起南西东国耻一洒黄金空十年燕雌今日雄君不见姑苏何用黄金屋豳鹿穿花豕衔蓍【礼重一作礼士】

吴钩行

吴人杀二子衅成双吴钩吴王食赏令不识钩中愁临钩呼二子飞来父心头百金何足报万户当封侯佩双钩比明月为君嬖者斩谗者刖制诸侯开伯烈千秋万岁光不灭

臙脂井

井无水荒龙椅不得如巴马子仰天夜见黄姑星水底喽喽话红鬼井中之人不殉死宫人斜在雷塘趾【趾一作尾斜宫人塚也】

平原君【一作平原君斩美人歌】

平原君起朱楼美人盈盈楼上居盘跚跋汲彼何叟美人一笑盘跚愁门下士引去

不可留美人高价千金直千金不惜美人头君不见帷中妇女观跛者一笑五国生戈矛
叶鸠【跛汲一作跛者】

春申君

春申君见利重见理蒙保相印封江东李家女儿入楚宫春申灭国并灭嗣舍人入
相遗腹子

聂政篇

齐国壮士侪要离念母与姊生慈悲既而母死姊同尸乌乎丈夫一死泰山重胡为
轻付市井儿

易水歌【并引 一作荆卿失匕歌】

儒门五尺童羞谈荆卿以其刺客之靡也然予观魏王沈事未尝不废卷三太息沈
之忍亡其主也然后知卿之矢死报知己较然为古义侠不可少也故君子追论燕俗之
长急人之义本于卿之遗风古今词人多拙卿而予犹以是取卿云

风潇潇易水波高冠送客白峩峩马嘶燕都夜生角壮士悲歌刀拔削【叶朔】百
金买匕尺八铍函中目光射匕尖【樊于期首】先生老悖不足与灰面小儿年十三事
大谬无必取先机一发中铜柱后客不来知奈何狗屠之交谁比数太傅言议谋中奇奇
谋拙速宁工迟可怜矐目旧时客击筑又死高渐离镐池君璧在水龙腥忽逐鱼风起沧
海君犹祖遗策孰与千金买方士乌乎荆卿荆卿虽侠才侠节之死心无猜君不见文籍
先生卖君者桐宫一泄曹作马

铁崖古乐府卷一

●钦定四库全书

铁崖古乐府卷二目錄

■〈木巳〉梁妻

宿瘤词

荆钗曲

冯家女【并引】

昭君曲【二首】

虞美人行

六宫戏婴图

即墨女

锺离春

唐姬饮酒歌【并引】

梁家守藏奴

大唐公主嫁匈奴行

丽人行

已上凡十有四首所谓比兴相侔哀乐相贯者也讽其词义以事其君子可以补房
中之遗音者复识

日重光行

三青鸟

大数謠

君家曲

三叟者诀

大难日

将进酒

城西美人歌【并引】

崔小燕嫁辞

城东宴

西溪曲

湖中女

长州曲

琵琶怨

鸣箏曲

内人琴阮图

内人吹■〈^竹遂〉词

内人剖瓜词

屏风谣

红牙板歌

奔月卮歌

箫杖歌

箎策吟

李卿琵琶引【并引】

张猩猩胡琴引【并引】

周郎玉笙谣【并引】

蹋鞠篇【二首】

邯郸美人【二首】

已上凡三十首重光三诀使之生有所保死有所遗余则杂以宴乐之作而知神仙贵富之有不足恃者也然其宴乐之中则又有戒者存焉复识

●钦定四库全书

铁崖古乐府卷二

（元）杨维桢 撰

杞梁妻

极苦复极苦放声一长哀青天为之雨长城为之摧为招淄水魂共上青陵台

即墨女【一作逐女词】

三逐乡五逐里即墨女儿乏容止齐相取之齐国治丈夫相国奚异此丈夫相国奚异此

宿瘤词

采桑女项如罍【叶汪】受教采桑不受教观大王大王聘之居中房旧衣不换新衣裳采桑女项如罍宫中掩口笑惶惶尧舜桀纣陈兴亡中宫笑口惭且惶服后服正后宫【叶光】卑宫室亲蚕桑减弋猎斥优倡诸侯玉帛走东方王上帝号声煌煌

锺离春【无盐女名】

锺离春白头深目凹鼻唇皮肤若烟面如尘手有五色之彩线为君补袞成天文渐台之君荒且歧明朝夷台作平地太子择日正储位锺离在宫齐国治

荆钗曲

扶风女行如有■〈新上女下〉貌如锺离春三十不肯嫁独识五噫君荆钗服终身井臼操必亲举案上食如大宾如何会稽守糟糠告去如市人

唐姬饮酒歌【并引】

姬东汉弘农王之妃也王为董卓所废王死时与姬饮酒别王自悲歌姬起舞亦挽袖而歌之其词曰死生异路从此乖予犹嫌其不以死殉王而其言如此故补之

皇天倾后土颓王降世兮汉祚衰王作黄泉兮誓相随王死胡用吾身为

冯家女【并引】

汉司隶冯方之女也避乱扬州袁术见而悦之遂纳焉甚爱幸诸妇思害其宠语之曰将军贵人也有志节当时时涕泣忧愁以长见钦重冯氏从之后诸妇因共绞杀系之厕术诚以为不得志而死也

冯家女绿髮盘双鸦乱离弃乡土聘入将军家将军爱幸诸妇妬颜色粹美无疵瑕擗鼻袭余术泪眼啼春华冯家女昨日堂上人今朝厕中鬼将军不为疑司隶不为理道傍古塚生棘榛千年古愤何由伸乌乎千年古愤何由伸

梁家守藏奴

将军椒房亲跋扈阨如虎嗟嗟孙家儿岂识鸢肩主有司夜捕帑藏婢及人母紫金与白珠没入将军府吁嗟乎梁家婢何太苦不知将军妻秦宫妇三主六君七贵人明日飞花乱红雨【不知一作不如】

昭君曲

边月生西弯明妃西嫁几时还不见单于谒金陞但见边烽驰玉关将军汉家高筑坛身骑乌龙虎豹颜何时去夺臙脂山乌乎何时去夺臙脂山

又

边鴈向南飞明妃西嫁几时归酪酥入馔损汉食酸风中人裂汉衣声音不通言语译分死薄命穹庐域君不见越中美人嫁姑苏敌国既破还陶朱嗟嗟孤塚黄草碧祗博呼韩双白璧

大唐公主嫁匈奴行

匈奴听镗忘劬劳【射父事】外家未必亡飞鶻如何异类待同匹丹凤下与梟为巢君不见大唐公主亲嫁辱终唐老鹞来相钞渡河归来话涕泣后人犹以昏为交

虞美人行

拔山将军气如虎神骓如龙蹋天下【叶户】将军战败歌楚歌美人一死能自许苍皇伏剑答危主不为楚雉随仇虏江边碧血吹青雨化作春芳悲汉土

丽人行【题玉山所藏周昉画卷】

杨白花飞愁杀人美人如华不胜春锦鞞驮起双凤缕黄门挟飞五花云白日雷霆夹城道乐遊园里春正好就中小姊最娇强雌雄双飞观者恼瑶池鬪草碧云移草青草歇春不知黄裊有恨随春水椒房青蠅何处起君不见翠羽飏飏帐一空东方蝮螭纏紫宫【蝮螭一作作蝮螭】

六宫戏婴图

黄云复壁椒涂苏银床水喷金蟾蜍宜男草生二月初燕燕求友乌将雏芙蓉花冠金结缕飘飘尽是瑶台侣宫中个个承主恩岂复君王梦神女梅檀小殿吹天香新兴髻子换宫妆中有一人类虢国淨洗脂粉青眉长百子图开翠屏底戏弄啞啞未生齿侍奴两两昇锦■〈衤朋〉不是唐家绿衣子兰汤浴罢春昼长金盘特泻荔枝浆雕笼翠哥

手擎出为爱解语通心肠宣州长史耽春思工画伤春欠春意吴兴弟子广王风六宫猫
犬无相忌君不见玉钗瑶鬋戕汉孤作歌请献螽斯图

日重光行

日重光今日西没明日上樽桑日重光日复日上樽桑人长往不返故室堂日重光
身后面目谁短长日重光言果果神依依

三叟者诀

道逢三叟者高寿比神仙问叟何以寿寿诀倘予传上叟前致辞大道抱天全中叟
前致辞寒暑顺节宣下叟前致辞百岁半单眠是为三寿诀所以能长年

三青鸟

翩翩三青鸟来自西王母作使东王公请致东王语白日不有夜四时长为春天上
神仙宅地上羲皇人

大难日

来日大难君不知焦心弊力欲何为早知大难学安期炼煮丹石服灵芝大药误死
世所嗤不如美酒千日可辟饥美酒醉饱一日以为老美酒不畅【叶昌】千岁亦为殇
大数謠

梁朝老桧昨夜死海声已入西门市草中张伯懷璧子丹瓶有书谁识此小夫争爵
几时休二十四考前无俦黄金无方铸髑髅楼船梦过西流洲更生灵香那得偷大树夜
听声如牛

将进酒

将进酒舞赵妇歌吴娘糟床嘈嘈落红雨鲙刀聂聂飞琼霜金头鸡银尾羊主人举
案劝客尝孟公君卿坐满堂高谈大辩洪钟撞金千重玉千扛不得收拾归黄肠【棺木
】劝君秉烛饮此觞君不见东家牙筹未脱手夜半妻啼不起床悔不日饮十千场

君家曲

生爱君家锦树坊君家易别苦难忘彩绳举柳高出屋金弹流莺飞过墙旧时春光
燕来后旧时主人十无九贾家贵婿多春情共醉君家画雀屏黄金只买五斗黛为君添
抹蛾眉青君不见张娘秋面不食粉八字青蛾莫娇损

城西美人歌【并引】

丙戌花朝后一日与客遊长城之灵山宴于城东老人所时偕遊者城中美人灵山
秀也酒酣作城西美人歌

长城嬉春春半强杏花满城散余香城西美人恋春阳引客五马青丝纆美人有似
真珠浆和气解消冰炭肠前朝丞相灵山堂双双石郎立道旁当时门前走犬马今日丘
垄登牛羊美人兮美人舞燕燕歌莺莺蜻蜓蛺蝶争飞扬城东老人为我开锦障金盘荐
我生槟榔美人兮美人吹玉笛弹红粟为我再进黄金觞旧时美人已黄土莫惜秉烛添
红妆

崔小燕嫁辞

阖闾城中三月春流莺水边啼向人崔家姊妹双燕子踏青小靴红鹤髻飞花和雨
着衣裳早装小娣嫁文央离歌苦惜春光好去去轻舟隔江岛东人西人相合离为君欢
乐为君悲

城东宴【拟剑南体】

青骢辔金牛车一时宾从高阳徒城东邸第三四区天气澹沲春三初主人爱客倾
中厨卜欢不知清夜徂胃纓絕烛欢有余卷波令格【音各】兵法诛客狂起舞作旋胡
主亦击缶呼呜呜人生浮草无根株齿髮日悴颜日枯含珠乌能润黄垆今日不乐将何
如君不见城南相国斲棺杀枯颇身名只共菹醢俱仕宦何用执金吾

西溪曲

西溪溪口东冈道杨柳阴阴春欲老花间系马我曾来红雨伤春迹如埽美人劝我
金色浆玉台赠以盘龙寶愿作西溪一水鱼趁尔容颜为余好城南将军同醉倒殡宫今
已生春草

湖中女

湖中水滑如脂湖中女芙蓉姿湖中小桨荡莲叶唱得吴王白雪词轻褰利屐踏鴈
足为客高歌激明目生年不作人家妇东人西人换恩主主家薄幸非三从归来抱瑟弹
孤鸿君不见东家女伴龕且丑嫁得比邻呼阿恂【读作锤】

长洲曲

长洲水引东江潮潮生莫莫还朝朝只见潮头起郎掩不见潮尾回郎桡昨夜西溪
买双鲤恐有郎槭寄连理金刀剖腹不忍食尺素无凭脍还委西溪之水到长洲明日啼
红临上头

琵琶怨

蜀丝鸳鸯织锦绦逻檀凤皇斲金槽弦抽瓮罍五色毫双成十指声嘈嘈塚头青草
天山雪眼中红冰嵬下血哀弦凄断感精烈池上蕤宾跃方铁

鸣笳曲

断虹落屏山斜鴈着行安钉铃双啄木错落千珠样愁龙啼玉海夜燕语雕阑只应
桓叔夏重起为君弹【愁龙一本作秋龙】

内人琴阮图【为顾瑛题赵千里所画】

花点吴盐春欲老翡翠飞来剪芳草美人睡起春思深弹丝拊木写同心荔枝五弦
调急缓阮家月琴轴初绾须臾钧天双合乐南薰殿中风动幕梨园乐官乐不鸣宫中之
音和且平

内人吹■〈竹〉遂词【为顾瑛题盛子昭画】

天寶年来教春坊紫云制曲吹宁王美人何处窃九漏耳谱亦解传伊凉鶺弦转断
黄金轴独据胡床弄横玉冶情忽逐野莺飞十指红蚕迷起伏御沟水暖浴鵙鵙天地久

无征战声芙蓉杨柳自摇落岂识黄云边塞情西楼今夜月色午内人思仙望河鼓白日
萧条风不来井梧风动神鸟语

内人剖瓜词【为顾瑛题盛子昭画】

辘轳索褪垂金井水殿风来晚花静美人睡起袒蝉纱照见臂钗红肉影荔子浆酸
摇左车阿母新进朱陵瓜侍奴手浴井花冷水冰金盘擎掌窠鸾刀未破圆玉斗斗破红
冰惊落手玉郎渴甚故相嘲可忍食残团月凹去声【玉郎一作三】

屏风谣

琉璃怯寒翡翠热芍药夫容四时绝深堂气候异冬春门外酸风箭入骨匡床髡
■〈登毛〉踏香雪红姬扶醉醉眼缣金缸焰焰照罗袜阿瞞娇娘太轻劣隙光射人如
白月

红牙板歌

长吉于梨园乐件歌之欲尽而于乐句之作独缺如也吴下缪才子遗余以红牙板
一具故为作歌补长吉之遗

百花楼前倡乐作长鼻弯弯舞金络生怜为齿焚雄躯枯魄应节如何虞良工削出
红冰片脱木生前岂容见自非红鸾之舌为尔绳安得三三贯成串三郎耳聪穿月肋强
欲黄番谱关折十三红儿舞鹧鸪轻莲蹋节随疾徐为君重制清平曲节奏八风调玉烛
【脱木或作朧木】

奔月卮歌【为茅山外史张伯雨赋】

神犀然光射方诸海水拆裂双明珠大珠飞上玉兔白小珠亦奔银蟾蜍千年太阴
鍊成魄岂识妖■〈虫麻〉吞啖厄剝胎乃堕欢伯计玉斧椎开桃扇核茅山外史海上
来拾得海月称奇哉按剑或为龙鬼夺掷手自戏仙人杯雄雷雌电绕丹屋顾兔清光吞
在腹醒来不记墨淋漓尘世随风散珠玉铁崖仙客气如虹金桥银桥遊月宫素娥饮以
白玉醴羽衣起舞千芙蓉居然月宫化蛟室坐见月中清泪滴我方醉卧玉兔傍但觅大
魁酌天酒不用白兔长生方

箫杖歌【为永嘉玃天则道人赋】

空心劲草琅玕节瘦如笔枝赤如铁壶公手中曾掷之黄公石上飞星裂玃天道人
双眼青见之不减九节藤神丁未窥混沌窍中有万壑铜龙声道人亲凿崆峒玉九漏玲
珑尺度足黑蛇飞来膝上横道人手中啸鸾鹤自言奇音不敢作寒星堕地风折岳去年
台山解虎鬪今年狼山敲豸角铁崖相见洞庭东腰间■〈竹遂〉佩苍精龙湘江雨脚
吹雌风相呼道人木上座杖陂水拔须眉峯

篳篥吟【赠朔客杜寛用赵季文韵】

春风吹船下扬州夜听■〈竹遂〉声江月流故宫摇落杨柳秋客子于邑山阳愁
明朝此声不可求乃知朔客杜寛者手持悲篳寻南遊胡笳拍中愁未休龟兹角篳亲编
收王门历尽及五侯翩然鸿飞不可留篳材既访柯椽鏊更协鸣凤昆仑丘卷芦易地鸣

陇头城南思妇歌牵牛欲絕未絕一缕抽划然石裂千丈湫叫噪鹅鹤飞蛟虬洞庭之水天东浮杜寬杜寬艺絕优艺隐岂比闵张【作推淳】俦为君贯美酒不惜千金裘和我君山锁邪■〈竹遂〉与尔同登黄鹤楼

李卿琵琶引【并引】

朔人李卿以弦■〈鼓上兆下〉遗器鸣于京师尝为李溉之学士赏识赐以清平乐章今年予逢卿吴下凡贵豪觞予者座无卿不乐夜与客宴散吕保徽卿且出溉之诗求续遗音兴酣遂呼侍姬江南春奉砚为赋琵琶引

李卿李卿乐中僊玉京侍宴三十年自言弦声絕人世乐谱亲向钧天传今年东遊到吴下三尺檀龙为予把胸中自有天际意眼中独恨知音寡一声如裂帛再拨清冰拆蛮娃作歌语突兀李卿之音更明白玉连锁鬱轮袍吕家池榭弹清宵花前快倒长生瓢坐看青天移斗杓铁箛道人酒未醺烦君展铁拨再轧鷓鸡筋我闻仁庙十年春驾前乐师张老淳赐箏岳柱金龙鬣仪凤少卿三品恩张后复有李国工须致身酒酣奉砚呼南春为卿作歌惊鬼神

张猩猩胡琴引【并引】

胡琴在南为第二弦子在北为今名亦古月琴之遗制也教坊弟子工之者众矣而称絕者眇北人张猩猩者絕妙于是时过余索金刚瘿【胡琴名】作南北弄故为制胡琴引

张猩猩嗜酒复嗜音春云小宫鸚鵡吟猩猩帐底轧胡琴一双银丝紫龙口泻下骊珠三百斗划焉火豆爆絕弦尚觉莺声在杨柳神弦梦入鬼工秋湘山摇江江倒流玉兔为尔停月白飞鱼为尔跃神舟西来天官坐栲栳羌丝啁啾听者恼张猩一曲独当筵乞与五花金线袄春风残丝二十年江南相见落花天道人春梦飞蝴蝶手弄金瓢【即金刚瘿也】合簧叶张猩猩手如雨面如霞劝尔更尽双叵罗白头吴娥年少歌金刚悲啼奈乐何【又作金缸】

周郎玉笙謠【并引】

丝竹之器贯古今而声不可以变者惟笙也潘安仁谓笙捻众清之林卫无所措其邪郑无所容其淫者是已乐记曰竹声滥滥以立会若笙又立会之要者故夔以仪凤鸣和神人王子晋以引鸣凤接浮丘之仙也乌乎下俚哇沸笙师之教几歇矣金华周郎琦独聪于此予尝于灵岩虎阜间闻其竒弄令人飘飘然有伊洛间意时坐客勾曲张贞居东海倪元镇昆山顾仲瑛云丘张仲简吴兴郟九成咸名能诗者也予为赋玉笙謠一首且率诸君子同赋而予又为引之如此

周郎学仙吹玉笙玉笙吹得丹山七十二凤之和鸣曾侍瑶池阿母宴座中调笑董双成谪向人间赤松洞洞口桃花苦迎送南寻二女湘水头十三哀弦不成弄西洞庭东洞庭相逢铁箛铜龙精从此吹春玉台上藜霄不许谢玄卿

蹋鞠篇【为刘娘赋也】

江南女儿花娟娟五花绣出葵花园蹋花上下双文鸳双文鸳玉连锁髻斜斜马初
堕

又

金鞭齐停马上郎落花旋风打球场绣轮掷过东家墙东家墙噪双燕平头奴摇便
面

邯郸美人【为赵娘赋也】

邯郸市上美人家美人小袜青月牙绣靴对着平头鸦平头鸦蹋场下包银壶驮细
马

又

裊翻柳脚垂青空水花吹乱秋芙蓉须臾气喘如渴虹如渴虹索银瘦转辘轳饮金
井

铁崖古乐府卷二

●钦定四库全书

铁崖古乐府卷三目錄

皇娲补天謠 上元夫人

毛女 籛铿词

大唐钟山进士歌 大人词

道人歌 龙王嫁女辞

湖龙姑曲 修月匠歌【并引】

梦遊沧海歌 璿台曲

罗浮美人 李夫人

望洞庭 五湖遊

茗山水歌 石桥篇

张公洞 登华顶峰【并引○吴复补】

庐山瀑布謠【并引】 花遊曲

已上凡二十有二首高情遠致见于方外仙怪及名山胜水之记遊而大人道人二
歌则先生闻大道之所自托也读之使人神遊八表而人间贵富为不足道矣复识

●钦定四库全书

铁崖古乐府卷三

（元）杨维桢 撰

皇娲补天謠

盘皇开天露天丑夜半天星堕天狗璇枢缺坏奔星斗轮鸡环兔愁飞走圣娲巧手
炼竒石飞廉鼓鞞虞渊赤红丝穿饼补天穿太虚一碧玻璃色辐旋穀转四极正高盖九
重悬水镜三光不凋河不泄天上神仙宅金阙当时坤母亦在旁下拾残灰补地裂【穀

转一本作穀奠】

上元夫人【为玉山题张渥画】

仙人在世间招之还可来何用三韩外楼船访蓬莱飒然精爽合偕入东华台怖我以蛇虎令我心死灰叔卿忽见鄙瑶池仍复回已遗瀉池璧尚献新垣杯金棺不炼骨空令后人猜君不见易招天上三天母难脱人间五性胎

毛女【列仙传毛女字玉姜秦宫人入华阴山中形体生毛】

沙丘腥风吹腐龙华阴毛女藏双鱼【叶农】宫中雨露不可食淦松啖柏留春容桃花流水迷红雾十二峯头度朝莫自是婵娟有仙骨入海徐郎岂知故衣沐雨鬢栉风榭叶楚楚山花红秦楼旧镜掩明月咸阳自送双飞鸿

錢鏗词

殷有贤大夫黄髮眉双白男女欲不絶饮食穀不辟四十九室家五十二嗣息岂是山泽癯咽漱炼精魄广成至道本自然有人得之同寿域君不见孔子窃比我老彭老彭之寿称以德

大唐钟山进士歌

睛如猫须如茅乌靴白简鸭色袍元是钟山老馱唐进士感君之赐何以酬君劳虽生不得禄誓死为鬼豪老馱血食岂敢饕宫中饱食有袄耗擘而啖之如啖螯乌乎若人使立朝殿前秉笏山动摇衔花有大耗窃笛有大袄肯使白昼见之而不梟尔袄尔耗根深蒂牢君王养之既吝且骄跳河蹴陇翻天之杓乌乎老馱胡可招乌乎老馱胡可招

大人词

有大人曰铁牛绛人甲子不能记曾识庖牺兽尾而蓬头见炼石之女补天漏涿鹿之帝杀蚩尤上与伊周相幼主下与孔孟遊列侯衣不异粮不休男女欲不絶黄白术不修其身备万物成春秋故能后天身不老挥斥八极隘九州岛太上君西化人自谓出于无始劫荡乎宇宙如虚舟其生为浮死为休安知大人自消息天子不能子王公不能俦下顾二子真蜉蝣【天子或作天地】

道人歌

道人飞来朗风岑玄都上下三青禽樽桑已作青海断螯丘又逐罗浮沉初见蜃精生月腹前身捣药■〈浦上女下〉娑阴还仙服食终恍惚天上仙骸成积林手持女娲百炼笛笛中吹破天地心天地心何高深八千岁无知音【上下或作上有○青海或作东海○前身或作前来】

龙王嫁女辞

海濱有大小龙拔水而飞雷车挟之以行者海老谓之龙王嫁女故赋此辞率匡山人同赋补龙姑乐府

小龙啼春大龙恼海田雨落成沙炮天吴擘山成海道鳞车鱼马纷来到鸣鞘声隐佩锵琅璫姬玉女桃花妆贝宫美人笄十八新嫁南山白石郎西来态盈庆春壻结子蟠

桃不论岁秋深寄字湖龙姑兰香庙下一双鱼

匡山人于立彦成和

东方龙君嫁龙女雷车彭彭载风雨神奸夜邀髑髅语碧草无光愁露渚蛟宫绡寒珠泪泣鸾袂行烟翠痕湿阿环娇小不成妆帝子霜田作汤邑臙脂紫土吹海腥阳侯击浪玻璃声湖边地皮薄如纸长堤卷作长江水【霜田或作桑田】

修月匠歌【并序】

按酉阳杂俎太和初有王秀才遊嵩山迷道见一人枕幙而坐曰君知月乃七竇合成乎月势如丸其影则日烁其凹处也常有八万三千户修之予即一数因作修月匠歌

天公弄丸七竇钿脆如琉璃拆如线月中斤人八万户勅赐仙厨琼屑饭什什伍伍入杳冥妙手持天轻欲旋千斤竇斧运化钧混沌皮开精魄见羿家奔娥太轻脱须臾蹋破莲花瓣十二山河影碎中轮郭重完冰一片缥缈长悬玉臼飞坚牢永结妖蠹患封辞何用虬虱臣功成万古蒙天眷一归兰路不知年兔子花开三万遍【兰路一作兰诏】

梦遊沧海歌

东海之东去国十万里其洲名沧洲地方五百里上有瑤涛玉浪出没九岫如罗浮风光长如二三月琪花玉树不识人间秋人鸟戏天鹿昆吾鸣天球橘子如斗莲叶如舟白凤如鸡红鳞如牛青瞳绿髮紫绮裘日夕洲上相嬉游铁崖道人隘九州岛凌风一舸来东溟始青天开月如雪锦袍着以黄金楼楼中仙人睨物表瑶笙引鹤缙山头戏弄玉如意击碎珊瑚钩相招元处士浩歌海西流长梯上摘七十二朶之青菡萏玉龙呼畊二万六千顷之昆仑丘黄河清浅眼中见海屋老人为我添新筹

瑤台曲

瑤台之山三万八千丈上有琼台十二高峻嶒草有三秀之英可药疾树有千岁之实能长生神人白面长眉青玉笙吹春双凤鸣晓然见我惊呼名授我以灵虚之簧和飞琼约我一双玉杵白重见西态盈刚风吹堕白雪精一念老作河姑星赤城老人在何处何以遗我九节藤拄到瑤台十二层【晓一作恍态一作熊】

罗浮美人【一作罗浮曲】

海南天空月皜皜三山如拳海如沼绿衣歌舞不动尘海仙骑鱼波裊裊翩然而来坐芳草皎如白月射林杪洗妆不受瘴烟昏縞袂初逢鸿欲矫手持昆山老人篋黄鹤新腔知音少江南吹断桃叶肠雨声夜坐巫山晓【昆山一作君山】

李夫人

絶代一佳人美色如洛妃【叶乎】春月为作眉上馥秋水为作眼中波【叶逋】歌琼蕤舞玉枝君王有情不自持玉枝一夜摧琼蕤一朝落君王之心何以乐若有人兮有若无来迟迟兮去促促【叶呼】夫容叶上清露结晴光倒射金虹灭山为雨海为雨何得分明梦中语落蛾影灭百子池灵风一阵彩云飞【山为雨或作为云何得或作何时】

望洞庭

乙酉除夕予雪中望洞庭认缥缈七十二峯时钓台槎客载雪适至相值一笑遂相率赋诗如此【乙酉至正五年也】

琼田三万六千顷七十二朶青莲开道人铁精持在手啸引紫凤朝蓬莱龙子卧抱明月胎须臾化作桃花腮嗟尔云槎子何处忽飞来蓬莱之浅今几尺黄河之清今几回云槎子云是江上来但知东方生卖药五湖上不知张使者北犯七斗魁云槎子吾与尔何哉任公钓竿在东海潮压桐江江上台

五湖游

鸱夷湖上水仙舟舟中仙人十二楼桃花春水连天浮七十二黛吹落天外如青沓道人谪世三千秋手把一枝青玉虬东扶海日红桑柸海风约住吴王洲吴王洲前掣水战水犀十万如浮鸥水声一夜入台沼麋鹿已无台上遊歌吴歛舞吴钩招鸱夷兮狎阳侯楼船不须到蓬丘西施郑旦坐两头道人卧舟吹铁篴仰看青天天倒流商老人橘几突东方生桃几偷精卫塞海成瓿窰海荡邛山漂髑髅胡为不饮成春愁【吴钩一作吴剑】

茗山水歌【一作火畊陈帝坟】

茗山如画云茗水如篆文使君画船山水里荡漾朝晖与夕曛中流棹歌惊水鸭捷如竞渡千人军渡头刘阮郎清唱烟中闻为设胡麻饭招手越罗蚡既到车山口还过■〈青盍〉水濱东盛■〈土斗〉前折杨柳西庄漾下纫香芹东村击鼓送将醉西村吹笛迎余醺三日新妇拜使君野花山叶斑斓裊使君本是龙门客宫衫脱锦披黄斤愿住吴依山水国不入中朝鸾鹄羣酒酣更呼酒挽衣劝使君游丝蜻蜓日欸欸野花蛺蝶春纷纷君不见城南风起寒食近老农火畊陈帝坟

石桥篇【天台道中】

飞精石为室万岁藏不得忽然混沌破石鲸横百尺山头方广开金策凌空来白猷双眼穴长跪不能越痴儿唾落饥蛟涎新鬼旧鬼悲人天蹋石梁拜石饼五百凌霄在心影过去过来弹指顷乌乎石梁折石饼崩人间方见方广影【广影一作广形】

张公洞

正月八日记遊仙三十六天洞灵洞洞中窗户夜不扃地底风雷日相哄嶮嶮灵骨谁手凿纳纳虚笏曷时瀕龙巔虎卧络薜萝委盖垂旃挂鸾凤茎高玉屑陈金杵洼陷琼浆流码瓮元田鸦色白于鸥丹室蛇光红似螭石函綠字紫泥封玄圃琼华青子种白骡有迹蹋石田金虎无声饮银汞樵柯已烂商四朋蓋輦初过第二仲牛车望气待著书螺女行厨时进供胡麻流饭阮郎来林屋刺船毛父通王生石髓随手竖吴客求珠空耳缝九灵太妙苞气母五岳真图特儿弄书传丹篆亦何须石化黄金本无用玉盆濯髮天鸡鸣铁笛穿空神马鞚符行律令鬼承呵声出脑宫龙听颂未应片石隔仙凡溪上桃花自迎送【毛父通或作毛父迴音洞过也○垂旃或作垂旌】

登华顶峰【并引】

华顶峰在赤城去地万八千丈其高与岱宗日观齐鸡初鸣见日出先生治天台日曾登绝顶赋诗今逸其藁在洞及笠泽上命吴复补之

铁崖仙人来自西崆峒琼林宴罢随天风天风散珠玉乃在华顶峰拔地一万八千丈但见琼台瑶阙■〈山截〉巉撑青空长松倚天不盈尺桃花水与银河通老仙独睨万物表炯如秋水开夫容火鸟夜半吐东海石桥飞渡天门龙九重启金钥千楹立彩虹列仙夹仗冰雪容中有晨肇双郎之窈窕珊珊杂佩摇玲珑胡麻饭初熟上案双玉童翩然迎老仙笑语风云从冰桃琥珀碗霞液玻璃钟陶然一醉三千霜【叶春】酩酊颜相映扶桑红归来笠泽成小隐林屋洞访浮丘翁下视东蒙尘土蒙蓬科万塚眠英雄【东蒙或作东华】

庐山瀑布谣【并序】

甲申秋八月十六夜予梦与酸斋仙客遊庐山各赋诗酸斋赋彭郎词余赋瀑布谣银河忽如瓠子决泻诸五老之峯前我疑天仙织素练素练脱轴垂青天便欲手把并州剪剪取一幅玻璃烟相逢云石子有似捉月仙酒喉无耐夜渴甚骑鲸吸海枯桑田居然化作十万丈玉虹倒挂清泠渊【天仙或作天孙手把或作手借】

花遊曲

至正戊子三月十日偕茅山贞居老仙玉山才子烟雨中遊石湖诸山老仙为妓者璩英赋点绛唇词已而午霁登湖上山歇寶积寺行禅师西轩老仙题名轩之壁璩英折碧桃花下山予为璩英赋花游曲而玉山和之

三月十日春蒙蒙满江花雨湿东风美人盈盈烟雨里唱彻湖烟与湖水水天虹女忽当门午光穿漏海霞裊美人凌空蹑飞步步上山头小真墓华阳老仙海上来五湖吐纳掌中杯寶山枯禅开茗椀木鲸吼罢催花板老仙醉笔石阑西一片飞花落粉题蓬莱宫中花报使花信明朝二十四老仙更试蜀麻笺写尽春愁子夜篇

铁崖古乐府卷三

●钦定四库全书铁崖古乐府卷四目录

古愤	贺丝词
赤堇篇	吴城怨
陈帝宅	雒城曲
采桑词	采菱曲
海客行	主家词
道旁骑	风日好
春芳曲	太师宅
招衣篇	南妇还【并引】
淇寡妇	七哀诗

伐木篇	瘦马行
金山孤凤辞	焦尾辞
纨扇词	白门柳
丹山凤	梁父吟
涂山篇	骊山曲
弁峯七十二	送客洞庭西
尧市山	夏驾石鼓辞
虎丘篇	要离塚
香山篇	陈朝桧
放龟池	东林社
隐君宅	道人一畝宅

已上凡四十首多古乐府之续题或写风情或述风土或吊古悯时及遊方外之作也以古风人之兴象带太史氏评裁诗家自老杜以来之所稀有也复识

●钦定四库全书

铁崖古乐府卷四

（元）杨维桢 撰

古愤

阴阴璞玉抱幽幽雌剑鸣玉屈有时白剑孤有时并如何妾玉身长抱碣石名如何妾剑身指为妖铁精天乎如有情蚀月为妾明地乎如有情河水为妾清【剑身或作剑声】

贸丝词

鸣鸠毋止棘止棘为摧薪女子毋贸丝贸丝为弃人相逢誓作同穴亲大礼如一失结髮不终身外为狂夫暴内为兄弟晒【叶平】寄语贸丝女卜语不可信况乃卜非真【大礼或作六礼】

赤堇篇

吴钩父悖子楚耶臣逆君曷比赤堇精新铸双龙文作世无价寶三卿无足论倚天落旄头仰日裂飞云一怒安天下持以奉至尊

吴城怨

吴兵夜入郢小弟骄父兄弯弓射天日攀土筑长城长城筑未竟客主老蛮荆

陈帝宅

荒城陈帝宅故殿吴王居曲池无镗石老树有遗株高堂易梵宇白足走钟鱼未知万代后兴废又何如【万代或作百世】

雉城曲

荡舟横塘去塘上野鸳鸯鸳鸯忽飞去相见双女郎齐唱雉城曲共制夫容裳手洗

藕花露劝君荷叶囊何以报永好解佩双明珰妾住雉城里不是雉城倡【手洗一作手挹】

采桑词

吴蚕孕金蛾吴娘中夜起明朝南陌头采桑鬓不理使君从何来调妾桑中意不识秋胡妻误认金楼子

采菱曲

若下清塘好清塘胜若耶鸳鸯飞镜浦鸂■〈𪇘〉鸕睡银沙两桨夹螳臂双榔交犬牙照波还自惜艳色似荷花袖惹红萍湿袂牵翠蔓斜大堤东过客背面在蒹葭日落江风起清歌杂笑哇

海客行

海客朱雀航下有五凤房三月发长干六月下淮扬青丝牵白日罗幕西风凉大姬劝金露小姬弹空桑中姬执药馔调冰浣肝肠海客睡不起明晏赛神羊

主家词

主家宴新客内屋深罗帷贵戚金与史长者陶与猗美人间中坐玉质缕金衣歌声上碧落不放青云飞杯行白莲掌酒饮黄桐脂门下有书客弹铗歌朝饥

道旁骑【一作春侠】

春风扇官道官柳黄金条道旁百金骑侠气争春骝竹间小桃花嫣如董娇娆下马隔花语疑是花中妖

风日好【寄冯来青】

春来风雨颠未见风日好今朝风日好美人在远道美人招未来相思把瑶草长鸟舞春风为我一倾倒

春芳曲

春容不再芳春华不再扬我欲倩游丝花前系春阳春阳不可系游丝徒尔长飞来双蛺蝶缀我罗衣裳顿足起与舞上下随春狂

太师宅

前朝太师宅基撤万民庐太师一去宅问宅今何如赤地无所有庭树八九株缅怀炙手日门前卿大夫肥马在东廐脂羊出中厨光妓列秦赵佐酒吹笙竽历年未五十一壤不枝梧歌笑不于此悔不桑为枢道旁甲第子过马一踟蹰【歌笑或作可笑】

招农篇

京城五都会卓锥争比闾朱楼矗隘址绣薨夹通衢洒削飧列鼎贩脂来驷车东家见妖丽西舍闻笙竽劬劬农家子住在三家墟一日出京市归不把犁锄千金卖恒产买屋京城居京城岂不美咄嗟异荣枯货殖非吾法守望非吾徒仰屋视门传壁立甑无储却归卜丘首邻里相揶揄嗟嗟食田子食技汝不如食田可久业圣主方捐租【来驷或作乘驷】

南妇还【并序】

南妇有转徙北州者越二十年复还访死问生人非境换有足悲者为赋之

今日是何日恸返南州岐汨汨东逝水一日有西归长别二十年休戚不相知去时
蚤髮青归来面眉黧昔人今则是故家今则非脱胎有父母结髮有夫妻惊呼问邻里共
指塚累累访死欲穿隧泣血还复疑白骨满丘山我逝其从谁【蚤髮或作鬢髮】

淇寡妇

淇上有寡妇始慕宋共姬食贫以自守笑谗懷猜疑忽为盗所污放僻靡不为昔为
淇妇宗今为淇妇嗤可怜困思反不如贸丝儿

七哀诗

贫耆欲无寿富嬰愿期頤惨惨里门道哭声一何悲白头洒慈泪红颜服罄衰借问
送车人共惜纨袴儿问齿未踰壮问家素不费黄金不贷死华屋中道辞南邻九十老带
索如荣期

伐木篇

伐木入空谷有木大蔽牛大厦孰倾栋一日蒙见收乃知匠石弃故非文本俦土腐
不中椽水沉不中舟拳不受隳揉櫓不受丹髹今兹忽邂逅陶我山之湫斧斤访薪木與
挽充吾樵我闻漆园旨寿或逃商丘幸有大不幸焉知桑柏楸

瘦马行

瘦马青海种新自流沙至市门顾不售千金价无二肉骀大项领疋帛可收致天寒
道里愁伏枥消遠志瘦马虽伶仃毅有千里气世无牙与青瘦马与谁试【顾或作愿与
或作为】

金山孤凤辞

肃肃金山鳳凤兮同阿房凤兮不鳳老孤鸣在高冈幸生一鸞雏毛羽蔚成章鸞雏
实不恶反哺天性良坐革梟獍暴不受雀角伤教之六律音因之暎朝阳来仪实有本凤
声益锵锵乌乎金山凤永为百鸟祥

焦尾辞

焦尾器犹在焦尾音无遗睠兹古人器絙以今人丝織手弄掩抑类作箜篌悲赤城
有佳士今人古人师独作古先操颀然如见之饮以化人酒此味从谁知

纨扇辞

团圆合欢扇比似月婵娟婵娟有时缺我扇岂长圆秋风落梧叶我扇同弃捐不得
如秋叶吹墮在君前

白门柳

步出白门柳闻歌金缕衣事生不事死曩誓今已遗空负地下心百年以为期向来
媒佻鳩宁为今日思【今已遗或作已违】

丹山凤

吴山五色凤千岁或一鸣来见君子国见则时文明自从鸣岐后野鸟袭为名凤兮
德久衰短歌空复情

梁父吟

步出齐城门上陟独乐峯梁父昂雉堞荡阴夷鬣封齐国杀三士杵臼不能雄所以
梁父吟感叹长笑翁吁嗟长笑翁相汉起伏龙关张比疆冶将相俱和同上帝弃炎祚将
星堕营中抱膝和梁父梁父生悲风

涂山篇【一作金山】

朝发一钱渡暮宿三江潮涂山有禅伯饮我松间瓢遂登福勋庙【福勋俗指为禹
妇翁】还憩汪罔桥涂翁不可诘夜附山鬼妖载吊漆姓人负恶忍抛苗既懷弯弓逆可
徒坐不朝逆名不可训姑以后至泉涧碣洗遗骨白日连山椒

骊山曲

骊山鬱崔嵬宫阙金银开月生鵙鹊观云遶凤凰台宫中红糝子调笑春风媒青鸟
衔巾去乳鹿巡花来天王太白次仓皇金粟堆石马动秋色羌枝连暮哀只今瑶防风氏
池水八骏渴生埃

弁峯七十二

弁峯七十二菡萏开青冥穷探最絶顶龙舌呀岩肩高原下絶壁海眼涵明星毒龙
戏珠玉残唾吹余腥胡僧洗神钵密呪收风霆洞庭水如蓝溟滓连沧溟下观人间世九
点烟中青

送客洞庭西

送客洞庭西雷堆青两两陈殿出空明吴城连苍莽春随湖色深风将潮声长杨柳
读书堂芙蓉采曛桨懷人故未休望望欲成往

尧市山

在太湖西属长兴州

湖山七十二西峯鬱相繆杯饮有尧井象畊余舜丘相传十日出大浸稽天流生民
窃生理托市兹山头只今东震水双雷没如沔仁人感地脉望望终南愁

夏驾石鼓辞

在夏驾山高一丈径三尺下有盘石为足谚云石鼓鸣三吴兵

周家十鬮鼓散落陈仓野犹有夏驾石盘盘驾之下秦鞭血山骨吴猎焦野火夏鼓
建不拔石鸣知者寡父老惧讖言山空石长哑

虎丘篇

路出女瀆湖警蹕霸王驱灵池飞霹雳枯塚走于菟老禅犹点石仙鬼只疑狐祖龙
来发闕银河又飞鳧【银河或作银海】

要离塚

金昌亭下路春草没荒丘云是要离塚令人人生古愁侏儿三尺干不佩双吴钩中包

猛士胆白日照高秋忍死屠骨肉视身若蜉蝣荆轲不了恨庆忌成身谋如何五噫客死与尔同仇

香山篇

在太湖西瀆西施种香之所

放舟脂塘曲盘游湖上雷雷鸣湖雨作还作香山隈美人鬪香草上有九畹栽美人
在何所塞芳招归来露下荆棘草鹿上姑苏台【还作一本还泊】

陈朝桧

在长兴大雄寺桧中裂为四枝垂荫半庭坚如金石故老相传陈高祖于梁天监中
手植于此寺即高祖故宅也

陈皇有遗迹乃在鸟山中当时手所植花木罗青红独有左纽树阅世如龟龙懷哉
手植人不见三阁崇后庭种玉树金井凋秋风

放龟池

在会稽马鞍山毛寶故宅也

我闻玄绪灵无逃豫且厄毛公赎金钱放汝鼃鼃宅何期报复义背负将军溺至今
山中池洞玄露纯白我归放搯床搯床犹翕息

东林社

陶公八十日解组归山阿觉今若不早我日十倍过开涂划荆棘斧缺且无柯莱尔
东林社招我南山歌回视有漏因已悟影与魔有求不补失无亏所成多坐断前后际不
须辩维摩

隐君宅

隐君宅中区心遊入天境酌空引窞石汲深出寒井檐花度吹香池叶漏天影隐几
鸣虚琴悠然有真省

道人一畝

宅道人一畝宅乃在清江浔山童解迎客开戸花木深幽草有遠意仙禽无俗音剑
气或成虎丹光欲流金丸中探日月画前见天心

铁崖古乐府卷四

●钦定四库全书

铁崖古乐府卷五目錄

沙堤行【并引】 地震謠

苦雨謠 大风謠

白雪辞 箕斗歌

盐车重 盐商行

牛商行 食糠謠

周急謠 劝棗辞

吴农谣	三男词
乞墦词	家仕叹
侯庶叹	秦刑篇
匠人篇	花门行
征南谣	忆昔
唐刺史	法吏【二首】
劭农篇	存与篇
樗蒲行【并引】	贫妇谣

已上凡二十有九首盖伤世教之陵替时事之间关大而天变细而民情微几沈虑寓于谑讽之中闻之者可以戒采之者可以观矣复识

●钦定四库全书

铁崖古乐府卷五

（元）杨维桢 撰

沙堤行【并序○一作两相沙堤行】

职林故事拜相礼府县载沙填路自其私第至子城名沙堤张籍李贺皆有沙路曲至正丁亥新拜两相曰雪雪曰太平天下皆曰贤故作沙堤行

神州和羹连五城沙堤新筑泰阶平正月一日太阳明殿前两相水金星天王垂衣珠箔卷太史新书五云见火城千枝花外转道逢吴牛问牛喘左谋右断天子前手持五色补青天南人不敢吹巢火中国堂堂相司马

地震谣

至正壬午七月朔地震如雷民屋杌隍土出毛如白丝纪诗一章章十三句

四月一日南省火七月一日南地震【叶平】地积大块作方载岂有壤崩如杞人如何一震白毛茁泰山动摇海水泄便恐昆仑八柱折赤子啾啾忧地裂唐尧天子居上头贤相柱天如不周保国如瓠馭民如舟吁嗟赤子汝何忧【如杞或作忧杞】

苦雨谣

去年雨坍齮土今年雨没灶釜灶釜三月青无烟官家火程不问雨胥靡移来坐监主旬申亏官走插户【旬申又作旬中】

大风谣

大风起不终朝如何三日夜日日夜夜旋扶摇卷水覆我舟卷土覆我窑乌乎太平玉管将谁调五日一风不鸣条

白雪辞【一作积雪】

痴云驾日日为黄白光半夜漏东方广寒兔老玉髮蜕一箭刚风落人世锦宫肉屏香汗溶酒如春江饮如虹彩鸾帘额不受卷酒面洗作梨花风阶前狮子积不壤十日琼田换尘界金钲取挂扶桑晓照见琼田出寒葶

箕斗歌

计字怯杓机紫木背文章我生之宿直箕斗不愁斟酌愁簸扬斗之柄实司天箕之风由犯月箕胡为张口吻斗胡为闞喉舌骑箕尾憩闾阖屏谗邪正出纳文昌开箕斗合盐车重

盐车重盐车重官骥牵不动官铊私秤秤不平秤秤束缚添畸令盐车重重奈何畸令带多私转多大商鬻不尽私醯夹公引乌乎江南转运涩如胶漕吏议法方呶呶【秤秤一作秤下】

盐商行

人生不愿万户侯但愿盐利淮西头人生不愿万金宅但愿盐商千料舶大农课盐析秋毫凡民不敢争锥刀盐商本是贱家子独与王家埒富豪亭丁焦头烧海榷盐商洗手筹运握大席一囊三百斤漕津牛马千蹄角司纲改法开新河盐商添力莫谁何大艘钲鼓顺流下捡制孰敢悬官铊吁嗟海王不爱宝夷吾筴之成伯道如何后世严立法祇与盐商成富媪鲁中绮蜀中罗以盐起家数不多只今谁补货殖传绮罗往往甲州县【淮西或作两淮】

牛商行

黄牛商水牛商驱牛渡淮道路长淮天喘热淮月黄老商爱牛视如伤淮民畊稼禾上场皮角有令恐牛殃君不见昨夜官军大索马牝牡千匹如驱羊

食糠谣

朝食糠暮食糠食糠不如彘与厖君王雁鹜令以粟甘易粮吁嗟今茫茫吁嗟何遑遑

周急谣

江南凶周最急汉家使者识经权矫制开仓输玉粒君不见曩岁沟魂悔不及至今冤作枯鱼泣

劝棗词

水旱阻尧汤生民无罪岁后代仓廩虚时和亦为沴孰云富而哿甚矣贫不继借富以贷贫穷哉已非计况乃指廩间夏楚劫以势【夏音贾】

吴农谣

吴农竭力畊王田王赋已供常饿眠邓通董贤何为者一生长用水衡钱【董贤或作偃贤】

三男词

金山铁冶家张氏妇一产三男人以为奇事予独稽诸史传而有唐檀子之隐忧焉君不见羌人之妻产龙鸞骆家之妇生虎狸造物好或怪痴儿以为奇金村铁妇不画眉健手能运千斤椎懷妊弗知十月期一诞三子如母豨邻舍来贺子公相出茅茨亲戚来贺子车盖生光辉里胥驰走闻有司三豎内有麒麟儿阴阳者流来与推张家瑞凤

三聯枝我聞其言信且疑歷扣古牒如元龜硤石三生未聞瑞南昌四孕徒招非有條給
乳本勾踐五羊十帛胡多儀他日唐檀驗後事不如介葛聞三牲

乞墦詞

獬豸不擊邪化作獸中狐屈軼不指佞化作蒿中藋黃金軀高蓋車千夫百喏在一
呼歸來牛馬驚里閭低眉仰面承妻孥奉澣【宋之問】嘗惡【魏元忠】卑自奴墦間
比來奴不如君不見衡陽有客方詫婦須髯似戟稱人夫【詫一作托牛馬一作牛酒】

家仕嘆

小仕時為養古有當會稽豈能食其官以官養旄倪千金買作郡萬金收滿車三年
遞郵傳誰以民為家

侯庶嘆

昔日王侯家廝庶躬阜柄後來事升降小兒家蕩析俯首廝庶門王孫有怵色

秦刑篇

秦刑悖聖教其律毒如兵大漢解倒懸文網舒急繩朝儀取雜用千載罵鄙生燕石
覓玉質鄭調求韶聲如何良有司尚欲復秦刑

匠人篇

匠人久失職秦人已開阡誰望云陽氣木土齒由拳後來興利者開渠引淮船吳牛
拖犂石喘月不能前老翁乏丁壯捕女在河邊投水作河婦天子罷庸田

花門行

大唐宇宙非金甌黃頭奚兒蠖作虬跳梁河隴翻九土惊呼夜半呼延秋朔方健兒
袖雙手戰馬傷春舞楊柳當時天驕不借兵渭闕黃旗仆來久快哉健鶻隨手招渡河萬
匹疾如猋白羽若月筋籥驕彎弓仰天落胡旄吁嗟健鶻有如許邀我索花固其所明年
西下崆峒兵壯士重憂折天柱折天柱唐無人引狼殄虎狼非麟空令漢女嫁非匹窮戶
夜夜愁寒云【惊呼一作驚鳥邀我一作邀功】

征南謠

錢塘江頭點行軍大艘金鼓聲殷殷千里萬里雞犬絕杳杳南國深蠻云蠻邦父母
苦不仁九重天子深無聞草間弄兵本鋤挺聚力四萬稱孤君皇華遣使宣主恩橫草未
立終童勛閩南摠戎賜斧鉞紫髯一拂清妖氛六駁生來食虎尊猛虎雖猛寧同羣于乎
猛虎雖猛寧同羣城狐社鼠何足云

憶昔

憶昔開元全盛時海陵官漕米流脂丁男老不識兵器九牧長途不拾遺宮中君明
臣告老天下夫和婦循道蠻夷玉帛涉海來海平遠接三山島仁人為邦未百年民間斗
米七千錢海陵官漕忽中阻大舶滅沒魚龍淵潢池弄兵本赤子渤海老臣能料理如何
嫉作豺虎叢島國稱孤姦萬死花卿猛將亂國章太阿倒持不可當君不見木蘭殺賊謝
天子賞功豈願尚書郎

唐刺史

冒天海国皆王土万里明珠贡天府一从官守失仁人牛马驱除化豺虎蛮衣有习黄巾帽蛮旗无字题王号九重天子矜蛮情黄勅加官非赏盗君不见溪蛮改过归大唐世授刺史以为常乌乎坐令白雉修职贡可是于今无越裳

法吏

法吏本止虐非以虐为屠仁君除肉刑仁吏泣丹书况以私怒逞锻鍊及非辜理絶好还天网元弗疏懷哉沈姆诚可但惧焚如【沈姆齐沈冲母也】

又

民有杀长吏于理大悖之仁人根所自吏德久已离击之柱后法鞬火掾焚輜彼哉汉儒论残贼忧软罢愿言敷国惠以膏残民痍

劭农篇

今日当假我县守初出郭出郭到谁家田父有新约桑阴抽戾戾石畸渡畧约田父喜我来酺酒出杯杓招来道上氓卖刀买黄犊水南架鱼梁水北筑稻屋十分麦上场两番蚕上箔永愿吏不妖重愿岁不恶呼妇杀黄鸡重话田间乐

存与篇

东家万金产西家百屋钱镮以铁门限自比长城坚须臾一转首后人不能传却观存与者非帑非聯阡巍然一高阁阅世而弗迁问君何能尔但指方寸田

樗蒲行【并序】

圣如孔子勇如飞将军而难遇于世片谭封侯斗酒凉州者何易易耶人曰命也遂以官爵等樗蒲然余观乖崖博胜事则樗蒲可以智力叅而命若未底于定也疑而成诗书寄郑有道先生达克庄绣使相发一笑

七十说不合片谈立封侯百战失飞臂斗酒得凉州人言遇不遇不系人劣优亡羊与得鹿等付卢雉投独不见张公座上三大户胡为百万一掷成私骰

贫妇謠

西家妇贫失身东家妇贫无亲红颜一代难再得皦皦南国称佳人夫君求昏多礼度三日昏成戍边去龙蟠有髻不复梳寶瑟无弦为谁御朝来采桑南陌周道旁过客黄金求黄金可弃不可售望夫自上西山头夫君生死未知所门有官家赋租苦姑嫜继歿骨肉孤夜夜青灯泣寒杼西家妇作倾城妹黄金步摇绣罗襦东家妇贫徒自苦明珠不传青州奴为君贫操弹修竹不惜红颜在空谷君不见人间宠辱多反复阿娇老贮黄金屋【龙盘有髻不复梳一作闭门花落春不知又作闭门花落青春深】

铁崖古乐府卷五

●钦定四库全书

铁崖古乐府卷六目录

金溪孝女歌

杨佛子行

金处士詞	彭义士歌
卢孤女	孔节妇
陈孝童	强氏母【并引】
蔡君俊五世家庆圖诗	铁面郎【并引】
奉使詞	春草轩辞【并引】
萱寿堂词	傅道人歌【并引】
留肃子歌	洪州矮张詞【并引】
秀州相士歌【并引】	禽演贈丁道人
冶师行	艾师行贈黄中子
医师行贈袁炼师	芝秀轩词【四章】
寿岩老人歌	

已上凡二十有六首皆詞咏一时忠臣烈士贞女孝童仁人隱士之遗事于太史氏之所未录者盖可为一代之诗史矣其激扬世教岂小补哉复识

●钦定四库全书

铁崖古乐府卷六

（元）杨维桢 撰

金溪孝女歌

唐敬宗时抚之金溪有金银场银戶葛佑者输银不足监官黄慷榜佑垂死佑二女投银冶中化银二錠事闻遂罢银场金溪为二女立庙至今血食危太樸有卷求余诗为赋孝女歌云

金溪石石生银凿石石有尽银令无时磷昨夜银官下【叶戶】山头点银戶葛家父无丁惟二女葛家父楚苦苦楚与死邻二女痛父闕一身骈首跳冶裂焰闇【叶音】裂焰焚身不焚二女心天惨惨神森森化作双白金双白金盛龙锦愿作万寿卮以奉天子饮一饮银鬼泣再饮银令寢【身一作二女】

杨佛子行

杨佛子越之诸暨人【生宋淳熙光宗朝】幼知事母母病危佛子割股肉进母母食病立愈母歿庐墓侧恒有驯乌集墓树随佛子往返佛子素患癭癭大如盎道逢异人以掌诀移之背郡县上孝感状将表其闾佛子辞遂止年九十岁安阳韩性既为佛子作传同里陈敢复作杨佛子行

诸暨县北枫桥溪枫桥溪水上接颜乌栖其下一百二十里合万和水万和孝子庐父墓墓上芝生萸杨生佛子与万和孝子齐六岁懷母果二十为母尝百药药弗医【叶】啖母以肉将身割母病食肉起其神若刀圭母死返九土常作婴儿啼倚庐宿苦块弃隔妾与妻嗟哉佛子孝行絕人人不识感鬼神頰下生瘤大如尊何人戏手瘤上扞明朝恠事骇妻子頰下削赘无瘤痕背上一掌印争来看奇痕坟头木共白兔驯更遣迎送乌

成羣傍人竹弓不敢弹岂比八九雏生秦县官上申闻旌户复其身佛子走告免称主臣
主臣嗟哉佛子谁媿称今之人有刃股乳诡孝子以为名规免徭征以希其旌嗟哉佛子
谁媿称【无瘤痕一作无留根】

金处士詞

吳人金可文贤智有才艺而自埋于民众喷然以处士称之权贵人以丘园科起处
士处士絕之曰予幸有庐一区在市關可以避风雨田一廛在郭外可以给衣仓学圣人
之道可以自乐不愿仕也且仕荣利禄隱乐真素苟以相易彼此两乖乖而强合吾不能
已吁处士如可文信其逸而贞者欤故集贤旧老相与署牒锡号曰贞逸会稽杨维桢为
之賦詩曰

苏州古隱君实始虞仲隱居放言中乎清与权次曰澹台氏言不枝行不径未尝匍
走诸侯前五噫之夫将其匹聯耕织为业不废诵与弦亦有天随仙配鸱夷子理钓船去
之五百年求继者孰贤闾閭古城阴曰有处士氏曰金长身而美髯【叶壬】风局孤古
古貌疎且沈家不失箴里不失任有余推与人矧肯爵禄入心心阙下足终南【叶吟】
贫贱易屈贵富易淫故大隱在關市不在壑与林凤皇不能引高神龙不能深【音沁】
深人呼为处士更加贞与逸号焉知古不如来今吾嗟今之士科隱丘复事王侯行无补
阙言无裨谋惟禄食是媒【叶牟】诡贞而隱诡逸而休以为吾人忧放而返涧恚岳陇
羞闻处士风其不泚然在颍岂吾人俦

彭义士詞【义士元履盱江人】

八十长者新城彭一生好义不好名天厯饥告江南氓官家鬻爵令新行嗟哉我彭
粟有盈内粟不与官爵争岂惟内粟爵不争民有乏逋我代庚乏力我又代民耕民流过
门给炊烹吁嗟尔民曷报彭期以八百之长生

卢孤女

卢孤女年十五官家新条括童女东家媒娘传巧语卢家郎选东床奈郎自有妇妾
使余不当蚤知急婚事如此悔不官家作驱使上堂拜姑身未知下堂失身惟有死归来
抱琴弹高楼苦调不作离鸾愁东家聘西家求明珠火贝争委投河可干石可泐卢家女
节不可勒生作只影蛾死作独根柏乌乎丈夫腐节随草莽阿卢之风齐砥柱若道钱唐
女淫苦安得有此卢家女

孔节妇

有美丈夫子玉质长■〈髟上莖下〉须自言五十五代孔子之孙孺其母曰陶大
家大家生儿六月余大丈夫即称孤零丁未保麒麟雏大家一节誓不渝身有死不二夫
与孤为命相噫呜保抱不啻琉璃珠但愿孤长寿竖我門戶扶我輿天助孔胤孤无虞五
岁解读书十岁能当闾二十作賦喧三吳揭来大家八十踰孤三釜心何如紫微相君新
下车上推先圣恩及孥荐书上达天王都承恩归来拜起居堂上鹤髮霜颜都烹羊击鲜
妇当厨里中姆謹相呼孔家生儿天与渠康之阜曲阜俱康之水流泗洙曰贞曰孝表一

庐杨子作詞譌不诬他日太史春秋书

陈孝童

孝童名福越之钱清人年十岁侍母叶病衣不解带母病甚水浆粒食不进口中夜潜出后庭泣于天曰我母病将死吾何依刲股代药天其从我乎股刲而母已死人谓刲股多救母童不能不亦妄誉乎予谓童知爱亲天之无伪者也刲股救母而知有其亲而不知有其身也又岂知有名哉季世奸民有刃股乳规免赋徭者若童又岂有赋徭而为是哉刲股童之天也母之救不救亦天也予居与童邻亲覩其事可以弘獎风教遂为赋诗

钱清陈孝童十岁知孝母母病日以革药饵空■〈口父〉咀夜庭人不知磨刀去剔股凡儿血肉躯躯小痛榘櫜孰识身在亲惨毒至刀斧邻里闻孝童涕泗下如雨道路闻孝童过车式其户堂堂士大夫结髮在庠序母背忍絶裾母丧亡捧土我作孝童诗岂惟风童孺

强氏母

毘陵强可事母以孝闻母年踰八袞可方以乡校官调转湖州从事感事母之日短遂以侍亲致事得升承事郎浙东帅府从事由是并得封母夫人县君今年至正戊子十一月二十三日长至适为夫人初度日也母子恩命皆以是日至故为赋燕喜诗一首俾令官歌之

强氏母毘陵人年已八十又一春强家郎未七旬五十入官教邑民六十转官在邻郡大府婉画方咨询守将急移檄候吏持在门强家郎捧檄告母母欣欣一笑还一嚔庭前大树风不停孝子惜阴寸寸勤强家郎养母素不贫食有祝鯁寝有五色裯其肯贪天之禄一日离其亲年未及致事辞檄奉晨曛中书重尔天性真驰文笺天天不嗔赐尔孝子七品秩绯衣始纳青丝纶强氏母随牒封邑君一阳复为生辰邑官里老走僦上堂与母千百寿烹羊炮豕罗鲑珍强家母抱牒谢天恩强家郎百拜百舞称蠶尊日日起居太夫人项间寿带日见双绦文眼前离立五世之儿孙强家母寿无匹荣无伦【儿孙一作诸孙】

蔡君俊五世家庆圖诗

蔡家肉谱繇司徒西蜀蔓衍云间居胡笳一洗怨女孤世世解读中郎书传家五叶忠孝俱鬱葱佳气无时无有母有母徐卿徐生儿袞袞麒麟驹桧岩【君俊父】老仙老不枯岩前双桂云敷腴绣輿从以斑斓裾或拜或立或步趋登堂好弄如羣鱼中有一人美且都柏垣成阴返慈乌平反一笑堂上娛春衫初试如舞雩樵青渔童侍两隅坐中有客皆鸿儒晴帘花吹引香篆午窻竹雨鸣茶炉不知人间有金屋弱海之外为蓬壶只今诸孙税■〈衤朋〉襦文采个个成于菟王阶清梦追尔祖种德政与槐阴符太夫人在锡冠帔曾玄满眼纒青朱纒青朱剩买丹青添画图【肉谱或作内谱税■〈衤朋〉或作脱■〈衤朋〉】

铁面郎美赵御史也

铁面郎不愿白玉堂愿着锦衣裳上明天耳目下见人肝肠江南使者欺天隐黄金车馱实虚牝忽焉青天近天目峰前见秋隼父老出郭门焚香拜使君使君天上斗斟酌元气成冬春成冬春立皇纪董狐已修三国史柱下惠文须出理江南驄行且止万一谗邪塞天耳手持尧时屈铁枝独立殿前言国是铁面郎真御史

奉使调美达尔玛氏也

至正乙酉天子遣天下奉使凡十二道三十有六人辉和尔氏达尔玛在选中巡察西川司臬吏舞法首击治之方面贵臣有骄而弗諵者亦糾诘之时政梗民必思痛豁去如鯁在咽必吐乃已彼不达尔玛如者如工尹商阳之兵杀三人以为不如是不足以反命事不幸类此而况生杀者皆不当法乎此西川使者之可调也

皇帝五年秋皇华遣使行九州岛皇明明见万里外犹恐阴暝生蜉蝣奉使代天明四目达九幽假天喜怒私恩讎欺皇明是非一逆海倒流其中荅理子西边托周游西边有鸟其名曰休留复有老狐九尾而九头扇妖作恠呼匹俦腹我赤子血上蔽十二旒力大泰山不可拔荅理子一触泰山拆之如不周乌乎汉有张纲卫有史鳧元达尔玛足追前猷太史笔不贬褒我作歌诗继春秋

春草轩辞

毘陵华孝子幼武六岁而孤善事其母以纯孝闻尝自取孟郊游子词名其所居轩曰春草予为体游子意赋

春草词春晖庭下春云暖春草轩前草长短中有百岁宜男花一色青蚨缀枝满青蚨子母生死恩草有灵芝生孝门春晖照人春不老芝草阑干芝有孙当时梦生芝草绿瑶草琅玕栖别鹤孤儿日长草忘忧锦■〈衤朋〉护儿如护玉春菲菲草油油千金骏马五花裘吁嗟儿兮毋好游铜驼陌上春风愁草萋萋春杲杲游子归来在遠道堂前何以报春晖身上春袍照春草【瑶草一作瑶圃】

萱寿堂词【为海漕府经历孙仲遠作】

孙家高堂风日好堂前秣树宜男草孙家阿■〈弥上女下〉昔宜家今日宜男复宜老香雾蒙蒙吹绣輿花雨斑斑上文裸阿■〈弥上女下〉之年八十深【一作今】五鸾恩诰封泥金孙家郎惜寸阴把萱酒为萱吟易摇千岁风前木难报春晖寸草心

傅道人歌【并序 一作傅劔子歌】

御史沃喟允常为余道傅道人事道人字隱阳朔人也性勇犷壮年无所用其勇遂执硃质之役于刑部会河南有以诖误系请室者若干人道人独明其非辜不忍陷死地且加存恤未几赦出之皆诣道人所谢再生之年其杀人之中又有仁义类此积劳当得九品官一旦弃去遇异师于關陝间与之语有悟素不识书即能赋五字诗道其所脱然者后遂入嵩山不还者十年父兄妻子莫知其所如往今隱居洛阳三井洞株坐不出好事者往候见之讫无一语吾子为古诗文喜录奇事若道人者亦一奇也且道人约余三

年后当见予洛城之东事果当以吾子之作遗之余读宋史知李芾忠烈之助亦一剑手耳其可以五百例贱其人乎若隱阳者既勇于敢而杀又勇于不敢而无杀脱退其役而进道于黄冠者师非其以执术为不是而讫善复其性者欤故为作歌一首复御史云

祈连山人天骨竒十五能运朱屠椎二十报仇许人死杀人不数舞阳儿乡里不能容官府不能治猛气奚所托仗剑归京师京师杀柄司秋官假尔爪虎豹關今日尸一逆明日诛一奸朝食悖臣胆莫食凶人肝龙蛇见血性忽改鳩隼化质身无难寻师度關陝弃家入嵩山只今啖松久辟谷劍埋三井飞精服能聯弥明石鼎句能和商颜紫芝曲客来启關不一语但闻鼻息声满屋乌台御史勿金公羣邪胆落称人雄囊封事毕志即东谷城丈人有前约三井洞前寻赤松

留肃子歌

留肃子草衣儒居无室屋出无驴十年落魄走吳下一日奋迅游天都自言袖有黄帝书淮荒海盜及吳租大臣不讳省中木法官交讥台上乌草衣言事不畏死请劍欲斩崔司徒

洪州矮张歌

洪州矮张道人术流之竒士也其术出国初李国用国用又出于德长老不苟干贵人即见贵人不苟佞不仁者规言之无隱推其人以占其家及其子孙之凶庆皆竒验若神轻财解难有古义士之风余客西湖大禹观而道人来寓与余邻时过谈天下事非今之豪杰所能及也且欲授术于予予谢未暇歌以送之

洪州矮张如矮瓠大帛深衣没双屨自言矮瓠不食酒惟贮先天九宫数蚤年侠气慕朱郭轻财屡倒千金橐得道人疑李士宁滑稽时效东方朔双瞳注射金蟆精口如急雨倾建瓴卒然一语中人隱王公错愕面发赭乌乎王谢误苍生天下乌用尔宁馨居中可乏汲长孺使边须用苏子卿我本先皇赐进士十年不调钱塘市宦程那敢问雄飞国法新蒙脱胥靡西湖西南山南水华落日清而酣画船载酒遁名姓三尺长喙金人嗟乎五鬼贼三尸谗矮瓠矮瓠无多谭

秀州相士詞

秀州相士薛氏见心者拜余笠湖上首出句曲外史自赞一首及缥册一帖且禪其言云持此以见梅花道人道人技痒当为汝歌歌讫然后乞其竒文章予为■〈口画〉然大笑既为赋歌诗一解又如其志书梅花道人传一通俾东归以复外史

秀州相士薛见心重湖风雨来相见手把茅山道人诗亦有胡僧写东绢白云膝不拜公卿海内名人初入卷缥绫方册锦盘囊首录梅花道人传道人不读姑布书两目看天走青电梅花忽露太极心南枝北枝开一遍秀州相士亦识道一突求心符铁券章生不相一只眼桑生不相一尺面貌如削瓜帝治开背如植鳍王业建君不见汉家将军如牯腰午夜脐灯照悲喟【一只或作一双】

禽演赠丁道人

令威仙人归故林白昼飞下天门深一千年人忽作鹤二十八宿皆为禽俛头垂翅
听驱使走报祸福不敢暗南方朱鸟献奇状部领其属来骏骏毛鳞羸介各异态肖像妙
合天地心翩然谢客欲高举便恐灭迹丹霞岑东州名山指华顶碧天倒坠青瑶簪人间
华表或可拟馭风时复来相寻

冶师行

赠缙氏子名长弓太湖中人与余铸铁笛者也通文史又善铸铁冠如意白云将铸
湖心境求余诗歌之云

湖中冶师缙长弓有如汉代陶安公七月七日与天通朱雀飞来化青童且莫随仙
踏飞鸿道人铁笛已在手铁冠八柱凌乔嵩皇帝一统诛羣凶猛士干将无所庸还傲上
青子天上裨重瞳江心火燄流赤虹云凝雾结愁蟠龙

艾师行赠黄中子

艾师艾师古中黄肘有补注明堂方笼有岐伯神针之海草【岐伯遗针于海岛岸
生艾草他艾十不及一】篋有轩辕洪炉之燧光【灼艾禁木火火镜火珠取火佳】针
窠数穴能起死一百七十铜人孔窍徒纷庞【华陀针灸不过数处】三椎之下穴一双
二竖据穴名膏肓百医精兵攻不得火攻一策立受降金汤之固正捣穴快矢急落如飞
鹤梅花道人铁石肠昨日二竖犹强梁明朝道人步食强风雨晦明知阴阳老师药券不
受偿何以报之心空藏施药胜施羊公浆会有仙人报汝玉子成斗量

医师行赠袁炼师

大茅先生上天司死生每岁考校月之二日为嘉平至今华阳有仙会会则鬼兽叫
啸丹光明上帝又闵其人之枉死必生仙医有如贞白者代居山中掬愚氓自从贞白上
仙去杏林剪伐橘井夷沟坑越七百岁乃有袖云氏弱冠学道朝天京天子问道赐爵秩
师拂衣去还山自吹鸾鹑笙不烧丹不辟谷不飡日月精不役罡诀甲与丁人有奇疾弗
能名爵如病草无勾萌师一视孳者伸瞽者覩跛者行问之无■〈口父〉咀之剂针石
之兵惟有日两炊馓折足铛乃云太上亲传一管笔三轴经无忧祖师传至我我奉行之
无足惊吾闻上古俞跗善疗疾不施汤液尚须皮毛解剥净洗五藏腥如何三经一笔乃
尔灵人报以金掷之如瓦砾以廉售欲岂比长安清亦何必隐居辛苦注草经呜呼人生
喜怒悲乐病易成须髮日槁为星星便从炼师乞浆啖火枣青华定录共共见茅君盈【
日两或作日用】

芝秀轩词

东仓马君瑞以芝秀名轩虞学士集为书其扁李著作孝光为之纪复求歌诗于余
故为赋骚词四章

芝秀兮煌煌罗生兮满堂紫云困兮如盖露湛湛兮沐芳美夫人兮贤媵集灵瑞兮
未央

又

芝何为兮为秀匪植以生兮匪培以茂协冲和以华滋兮食之而寿

又

山嵯峨兮谷逶迤歌紫芝兮吹参差懷美人兮不可以追

又

铁之涇兮凤之沼思公子兮善窈窕善窈窕兮乐康聊逍遥兮岁年老

寿岩老人歌

寿岩老人者吳兴钦先生德载也老人仕宋为都督计议官宋革老人奋义兵不肯送降欵天兵募生致其人义其言议而官之老人列其板授言即遁隱长山之石岩石生冬青万年之枝老人遂号寿岩又自志以文去老人之死四十年其孙驥出其手泽求余歌之

寿岩老人宋都督不肯新朝食周粟水晶国里七寶山别有天地非人间山中黄石眠怒虎圮上传书曾有语归来牧羊寻赤松万年枝上盘冬龙冬龙万年与石斗老人一杯持自寿炼石未补南天孔【叶空】坐见瀛州生软红呜呼寿岩之人兮元不死南斗化石齐崆峒

题铁仙人琴书真乐窝【附录李孝光所作也】

举世之乐无如鼓琴琴可以禁人之邪心易人之哇淫举世之乐莫如读书书可以絕小人之狭邪履君子之坦途世人为乐千种口不如我乐长可保彼有嗜酒乐饮逢毒若酖艳妻謹虞自令身枯溺心货殖为盗贼积崇势凌人鬼神断嗔蚤官骄子疾为祸首或世所乐自诡神仙累万人学无一长年有乐放恣毁除须髮捐弃父母终竟不觉有察于狱谓俾不憊性习浸移久而泰甚凡此众乐岂不可懷不如我乐无患与蓄铁仙左琴右书传终日危坐笑以哈忽见吾诗仰天歌铁仙岂不大乐哉

铁笛歌为铁崖赋【附杨先生所作后】

铁崖道人吹铁笛宫征含嚼太古音一声吹破混沌窍一声吹破天地心一声吹开虎豹闼彤庭跪献丹宸箴问君何以得此曲妙谐律吕可以召阳而呼阴都将春秋二百四十二年笔削手谱成透天之窍价重双南金掉头玉署不肯入直入弁峰絕顶俯瞰东溟深王纲正统着高论唾彼传癖兼书淫时人不识我不厌会有使者征球琳具区下浸三万六千顷之白银浪洞庭上立七十二朶之青瑶岑莫邪老铁作龙吼丹山凤舞江蛟吟勗哉宗彦吾所钦赤泉之盟犹可寻更吹一声振我清白祖大鸣盛世载賡阜财解愠南风琴

铁篴謠为铁崖仙赋【附录云间钱■〈才上鼎下〉作也】

铁崖仙人冠铁冠锦袍不着衣褐寬弃官流荡山水窟胸中竒气蛟龙蟠手持铁篴窍有九铮铮三尺青琅玕吹之竒声絕人世抑扬悲壮凌云端铁崖山高百丈片片吹落梅花寒太湖老渔狎唱清江歌仙人側卧吹回波七十二峰翠鸾舞大雷小雷走深涡君山弄最竒絕一声草木摧两声山石裂三声蜿蜒跃波起四声卷海作飞雪五声山岳

尽动摇六声百鸟皆噤舌七声吐气成虹霓搏桑枝上金乌啼八声射光凝牛斗丹桂枝边玉■〈鷓，兔代鸟〉吼九声十声迸银河鬼神股栗天嵯峨河鼓辍琼耜天孙停玉梭九重震迭开荡荡帝阍惊定忘撝诃钧天大人侧耳听口勅仙吏旁搜罗分甘吹笛乐吾乐芒屨懒上金銮坡仙人仙人铁石肠引喉喷铁金琅玕中通外窍直以刚镞鄗善鸣愁凤皇底须截竹昆仑冈愿将铁崖寿铁笛后天不老凋三光

铁崖古乐府卷六

●钦定四库全书

铁崖古乐府卷七目录

堠子辞	鍾藤辞
醴泉辞	泳水辞
泉芦辞	龙虎辞
狗马辞	鷹马辞
凤锵锵	鹤跼跼
五禽言【五首并引】	归雁吟
两鹑鹄为颜氏赋	匹鸟曲
蛟人曲	义鸽【三章并引】
警鷗【三章】	射罟行
斗鸡行	杀虎行【并引】
白翎鹊辞【二章】	佛郎国进天马歌

已上凡三十首皆先生涉歷世故有慨于衷多托于鸟兽草木以起兴者讽者得其旨则劝善惩恶盖亦不无补云复识

●钦定四库全书

铁崖古乐府卷七

（元）杨维桢 撰

堠子辞

堠子个个复个个十里五里官道课行人快捷方式行不从官道过吁嗟堠傍岐转多堠子荆棘如铜驼

鍾藤辞

南有美木鍾藤束【叶朔】只鍾藤日肥美木削只于乎孤刚柔恶毙之孰操斧斤为我理之

醴泉辞

醴泉兮无源灵芝兮无根如何求俟兮而欲求乎人门

泳水辞

泳水可以寻珠【商丘开】射石可以饮羽【李广事】乃知一心之人兮遇物而

无连

泉芦辞

泉徙而不成凤兮芦种而成荻此智者之操心兮受降同乎受敌

龙虎辞

槛足兮虎成狗烧尾兮鱼作龙得势失势兮而以分乎雌雄

狗马辞

狗有乌龙兮马有的卢的卢狗主兮乌龙食奴于乎交之借兮无解孤之托兮无婴
吁嗟乌龙兮狗之解吁嗟的卢兮马之婴

鹰马辞

鹰使司漏马使警偷臧者守杼获者运牛彼此职废空抱主忧君不见薛恭尹赏各
有所两地一易俱称优

凤锵锵

凤锵锵求其凤凰既得不复念母将不如城头乌日日夜夜哺母与母翔

鹤跼跼

鹤跼跼乘君轩肉豨重不复戾九天不如地上鸡乃得窃药随飞仙

五禽言【并序】

禽言无出梅都官之作予犹惜其句律佳而无风劝之意故予制五禽言言若拙而
意颇闳风劝焉

唤起唤起东方明门前已如市上林有乌杀司晨苦杀萧娘睡方美

又

提胡卢提胡卢沽酒何处沽乌程与若下美酒高无价小姑典金钗劝郎醉即罢君
不见城中官长壶卢提十日九日醉如泥

又

姑恶姑恶姑不恶妾命苦姑有孝女姑为慈母妾亦甘为东海妇

又

子归子归子不归白头阿■〈弥上女下〉慈且悲子弗归待何时君不见西江处
士章九华十年去赴丘园科母死妻啼未还家

又

行不得哥哥我不行奈我何西山有豺虎西江有风波风波尚可壶豺虎尚可罗努
儿闾平地多行不得哥哥

归雁吟

江南荷叶黄见尔来江乡江南春水暖归路同天远春复秋秋复春南来北往多苦
辛沔为友鹭为邻他山鹧鸪好结婚只往江南生子孙

两鹧鸪为颜氏妇赋

两鹑朝朝莫莫啼不休天阴妇弃去雨止还相求天公阴晴变不测嗟尔夫妇难
为速勃勃水西头啼过东家楼东家楼前琅玕树枝枝连理森相樛无风无雨春正好愿
尔长作鸳鸯俦莫效前身鹰隼仇

匹鸟曲

建章宫中匹瓦飞太液浮起双红衣文塘小径迎春归春红莲叶春猗猗金丸娇郎
故惊起白头双飞誓双死上林雁妇忍流离九疑侘侘天万里长干沙头人望夫愿托锦
翎西江书结生不作白头伴结死须作青陵乌

鲛人曲

鲛人居钱塘湖自从剑客过湖去世人不识真仙儒灵丹掷湖水湖水清如酤江妃
惜不得贮在明月壶鲛人夜饮明月映夜光化作眼中珠手擎莲叶盘一株盘中走珠汞
不如世人无僊意波心荡漾青头鳧烹龙炮凤日日千金厨何以洒君心热宁君躯洒君
热宁君躯须饮鲛人明月珠

义鸽三章【并序】

予读康里相家义鸽志为之喟曰嗟乎通文史如卫仲道妻而有不鸽如者彼忍于
不义不忍于死尔蕞尔鸽非有伦理之教诏也又岂识有一醮终身之义乎而托以死答
所配非其所恶有甚于死者乎于乎人之所以异于禽兽者义尔而义反灭之则物性反
优于人乎嘻吾不知之矣抑予闻鸽之不止义也养其子也鸣鸪之仁其托书也鸿雁之
信爰赋三章以补前人之缺云

肃肃兮飞奴好尔匹兮哺尔雏吁嗟尔德兮均慈爱于鸪

右一章

肃肃兮飞奴离尔俦兮别尔家吁嗟尔劳兮比鸿雁兮将书

右二章

肃肃兮飞奴歎相失兮夫妇死者兮已矣生谁适兮与娣朝不粒兮无与呼莫不室
兮无与居岂无他侣兮我侣不如阅七日以死兮矢一节而弗渝吁嗟尔烈兮继比兴乎
關雎

右三章

警鷗三章

吁嗟乎鷗来兮汝趾不爪兮臂不翎横口坚齿长眉目叶姑兮曾不钩吻而金睛胡
为肆攫搏兮勇憑陵称人类兮负鸟名吁嗟鷗兮反己灵庠序汝乡兮衣冠汝朋

又

横翔傍舞兮羣笑以噀阴窥狙伺兮风草动摇嗟尔丑兮不可以招鷗一狝兮将汝
梟上或牾兮下或僇隔截鸾鹄兮愁青霄吁嗟鷗兮逞尔豪击刚者怠兮与尔乎同遨

又

贞柏苍苍兮乌府初霜寒气袭袭兮阜鷗在傍匪汝朋比兮伏阴紆阳扶竖正直兮

不茹吐其柔刚鸾凤远举兮梟獍云亡吁嗟鷗兮不改行収汝族兮磔以禳

此先生在天台喻其豪民未率化之作也今其人有更名改过求自列于善民以一洗旧日赤书其门之丑故曰诗可讽也

射罍行

草枯燎发原野赤老罍愤起千军敌将军名号巴而思【虎名】白羽惯数黄狼肋老罍决石如怒猊将军立马攢霜蹄满弓一射正贯脾马前突立人而啼南山白额当道卧东西之人不敢过少年匹马随噪呼从渠生拔白额须剝白额作饭器坐令泰山之妇歌好世

鬪鸡行

两雄勇銳夸匹敌老距当场利如戟毳毳毳毳猬刺张怒咽魄礪嗔睛碧剑心一动碎花冠口血相污胶彩翼何当罢鬪作啼声埭上梨花春露滴

杀虎行

刘平妻胡氏從平戍零阳平为虎擒胡杀虎争夫千载义烈有足歌者犹恨时之士大夫其作未雄故为赋是章

夫从军妾从主梦魂犹痛刀箭瘢况乃全躯饲豺虎拔刀誓天天为怒眼中于菟小于鼠血号虎鬼冤魂语精光夜贯新阡土可怜三世不复仇泰山之妇何足数

白翎鹊辞【二章】

按国史脱必禅曰世皇畋于林柳闻妇哭甚哀明日白翎鹊飞集干朶上其声类哭妇上感之因令侍臣制白翎鹊词鹊能制猛兽尤善禽鴛鹅者也旧词未古为作白翎鹊词二章以补我朝乐府

白翎鹊西极来【叶黎】金为冠玉为衣百鸟见之不敢飞雄狐猛虎愁神机先帝亲手鞬重尔西方奇海东之青汝何为下攫草间雉兔肥奈尔猛虎雄狐狸

又

白翎鹊来西极地从翼旋山目侧边风劲气劲折胶材官猛箭与之敌黄狼紫兔不余力须臾白雪轻一举千仞直鴛鹅洒血当空掷金头玉颈高十尺千秋万岁逢玉食

佛郎国进天马歌

天马歌本古乐府车马六曲之一也汉郊祀乐歌亦有之然汉之得天马或出于汉贰师将军之伐宛非德徠之维我有元至正圣人德被西裔而佛郎马来宜作歌章光赞乐府故作此歌

龙德中元气昌天王一统开八荒十又一叶治久长前年白雉来越裳中国圣明日重光仁声馭脊动嘉祥乌桓部放号佛郎实生天马龙文章玉台启闾阖张愿为苍龙载东皇瑶池八骏若有亡白云謡曲成荒唐有元皇帝不下堂瑶母万寿来称觴属车九九和鸾锵大驾或驻和林乡后车猎俟非陈仓帝乘白马抚八方调风雨和阴阳泰阶砥平玉烛明太平有典郊乐扬尚见滎河出圖像麒麟凤鸟纷来翔

铁崖古乐府卷七

●钦定四库全书

铁崖古乐府卷八目录

覽古【四十二首】

●钦定四库全书

铁崖古乐府卷八

（元）杨维桢 撰

览古

晋师纳天王大义白日披尹固附孽子奉籍奔蛮夷道逢秋郊妇三岁尔大期三年
尹固死妇言如蓍龟

又

出姜哭过市呼天天实闻市人皆涕下鲁贼当谁分出姜不口鲁麟笔诛其君

又

秦穆饮盗马楚庄忘絶纓齐景恩一木触槐有淫刑婧女告齐相称说辩且正明朝
拔槐令婧妇脱因名

又

单父七弦琴为治务感兴十金南门木立令务必行单父有成效夜渔若严刑南门
能徙木不能徙民情以此知巧信不如拙而诚

又

韩厥戮赵仆不以私害公后人援此义往往为逢蒙曲逆不背本事主可移忠伟哉
刘公论吕布真难容

又

应侯刻薄人须贾得无死飞将杀霸陵狼狼不足齿如何画眉郎五日杀掾史

又

齐相善求治议论人人殊盖翁本黄老一语盖有余诸儒不足聽醉吏自足呼醉吏
狱不扰诸儒多诉狙

又

恭俭汉天子取士忌少年未应绛灌徒廷中肯妨贤徒为宣室召复有长沙迁不见
冯都尉【唐】龐眉竟谁怜

又

田叔作鲁相王不敢游田痛愧取民物偿以中府钱汉人重长者长者岂非贤

又

任安与田仁同仕将军门厮养恶齿马实坐贫失身发愤骑奴席拔刃徒自分不会
赵少府何时别奴羣乃知圣贤仕端不与贱贫

又

郭解本大侠睚眦杀人威当其出邑屋独不杀倨夷属吏脱践更卒感肉袒来此事
实近道可以侠少之

又

汉廷古遗直免官归田园已闻御史奏严李有飞言【严助李文】矫制独无罪加
冠礼终存谁谓淮阳召淮阳为寡恩

又

出關弃繻子南征笑狂生左右无黄髮淫夫挟之行戮杀汉使者君臣起大兵尉他
羈汉绶何曾请长纓

又

成都卖卜士大易先天心弟子一区宅桑榆有余阴何为天禄阁忘身几陆沈门前
载酒者奇字时相寻为谢门前客从今传酒箴

又

子陵江海客本非沮溺伦仁义立奇论岂果忘吾民狂奴作故态飘然归富春客星
犯帝座太史奏天文故人信符讖三公等浮云

又

武丁梦良弼审象极冥搜光武思故人物色在羊裘彭城有处士君恩贲林丘股肱
不为用颜色徒相求

又

董卓切慈明【荀爽】次以及伯喈【蔡邕】子龙独何人【申屠蟠】谈笑却喑
喑高视梁砀上片云卷而懷古来高世士尘埃岂能埋

又

襄阳有高士生产不曾治何以遗妻子鹿门有深期籍籍齿牙论龙凤名诸儿诸葛
拜床下可是圯桥师

又

孔公荐一鹗义烈争秋霜矢心报知己讨贼尊天王渔阳掺英愤夫岂病悖狂营门
三尺梟【音脱】杀气披揜抢

又

会稽嵇叔夜才气浩不羣平生癖于锻余好在琴尊不如一长啸携琴学苏门可怜
广陵散奇弄今无闻

又

汝南许文休丧乱一弩士敢当诸葛拜合受玄德鄙士论推指南无乃失臧否乃知
郡公曹排摈有公是

又

知子石司徒分材靳齐奴诸仲财不如财穷东市诛吁嗟石司徒知子良不愚

又

洛阳轻薄子挟弹走春嬉结交金谷友谄事贾午儿蔑弃慈母训干没不知几感已
赋闲居犹以拙自悲

又

弹琴戴安道焦桐破竒声蔚宗与文季俱以琴自鸣天子不得屈王公不能聆独怜
褚司徒银柱老齐伶

又

我爱王懷祖面壁售人骂不比少掾时瞋目荅米价褊中顿有容坦之詎能过桓桓
大将军汉业在出胯

又

青青五柳宅贫无三径资去叅建威幕为贫良亦非彭泽八十日胡为遽来归乃知
决然逝非为乡里儿首恶王休元酒亦无所辞华轩欲载我我心詎能违

又

王湛蓄深器世人不能窥大慧实若愚人遂以为痴可怜济父子同门不识之何况
隔千里而欲求人知

又

羲之在东床风操夙所称蓝田誉转重胡乃意不平出吊曲在我反恶固其情以此
悻悻死无异匹妇轻

又

韩信卜母地旁置万人庐郭公卜邻水长洲偶成墟千秋杨子窆投弃同江鱼裸髮
何为者厌魅开籛籊孰借神丁火焚却青囊书

又

郭磨精术数知晋必亡秦逃秦遠归晋追兵杀亡臣洛阳牛背叟读书孝其亲凉州
未经破先归忽如神术人不灵已哲士固全身

又

骚雅去已久宫体争哇淫洛阳风一变积性随人心鄉關思萧瑟作赋哀江南【叶
任】调入金钗臂亡国有余音

又

尝疑王孝子素履朴且庄门生服县役径行想不扬孝子躬馐具磬折在道傍门生
役已脱诡道由此行

又

郑州跛男子【娄师德】识者惟客师【袁客师】深沈有客量不为同列知唾而
戒其弟俛世一何卑君看白水润沫额宣弩资

又

世疑狄文惠不知姜师德姜公吾不贤此意人未识古来嫌忌间吾道忧比迹

又

开元刘神童名字瑞一时文学不济世鞭算竞刀锥招权啖士口使不得有警任数
不任道兴利固如斯

又

小儿贺季真弃官亦弃宅远谒王道者去问术黄白何物袖中藏去道万里隔

又

严家儿八岁杀父姬严家父称奇养成虎豺恶腐儒弄虎髭嗟吁豺虎天早毙七十
慈亲免官婢

又

姚家有裨将腰佩双青萍青萍夜脱匣忽杀程务盈为书报杀状伏剑随自刑吁嗟
古义士岂复数荆卿

又

厚施而薄望郭解愧朱家大唐郭氏子【元振】手剑寒奸邪贖金四十万主名不
知夸结客豪侠场此客实无加

又

昨日满头花堂上争春妍今朝大风起花落玉津园旧地易淮陝取馘谐戎门可怜
于期首不谢永州魂

又

东人送降款西人纳降城长沙李太守誓死城不盟高楼一举火老穉同焦冥

又

要离蕪妻子大盗空古名峩峩南文山光■〈光色〉日月青妇义终一醮臣道无
改更宁戴一天死不载二地生尚怜广西弟有愧颜家兄

铁崖古乐府卷八

●钦定四库全书

铁崖古乐府卷九目录

城门曲

烽燧曲

關山月

饮马窟

剑客篇

侠客词

放麕词

牧羝曲

摘瓜词

桑阴曲

贞妇词

朱厓令女

姐己图

三阁词【四首】

雌雄曲	连理枝
朱邸曲	高楼曲
玉蹄騶	珊瑚鞭
浣女词	绩妇词
织妇曲	商妇词【二首】
清塘曲	春波曲
采莲曲【二首】	杨柳词【二首】
寄春曲	赌春曲
玉镜台	回文字
生合欢	缆船石
望乡台	乞功词
闻雁篇	系马辞
买妾言	续弦言
归客误【二首】	自君之出矣【二首】
吴子夜四时歌	屈妇词
新来子	同宫子
阳台曲	苏台曲
邯郸道	昭阳曲
团扇歌	白头吟
铜雀曲	绿珠辞
焦仲卿妻	小临海曲【十首】
桂水五千里【四首】	

已上凡八十首为古乐府小体间有串史断于比兴者尤古诗人之难也国风好色而不淫小雅怨诽而不乱兼之者此诗有焉复识

●钦定四库全书

铁崖古乐府卷九

（元）杨维桢 撰

城门曲

谍报越王兵城门夜不扃孤臣睛不死门月照人青

烽燧曲

闻道骊山下西戎已结兵美人方一笑烽火不须惊

关山月

月出关山顶将军鼓角悲汉皇今夜宴影落素娥池

饮马窟

长城饮马窟饮马马还惊宁知呜咽水犹作寶刀鸣
剑客篇
昨夜征西去西兵尽倒戈丈夫学剑术何用效荆轲
侠客词
未许同交死全身报国仇太阿飞出匣欲取贾充头
放麈词
母麈急麈子猎父视如伤太子奔城父千秋忆奋扬
牧羝曲
老羝何日乳归雁忽能言不逐虞常死丁零尚有恩
摘瓜词
黄台八瓜熟瓜熟飀绵绵惟有大瓜好狐来瓜已穿
桑阴曲
妾自夫君戍桑阴路不通将军哮似虎少妇窃秦宫
贞妇词
皎日常持信仓皇不改真君王符不到水长渐台倾
朱厓令女
關朱争两死两死独谁当關吏不垂泣青天应雨霜
姐已圖
小白竿头血新图入汉庭宫中双燕子齐作牝鸡鸣
三阁词
江南龙虎气楼阁照金银望见长安道不知尘污人
又
璧月几时缺玉枝几时枯阁中连理伴夜咲素娥孤
又
昨夜韩擒虎将军奏凯回井中人不死重带美人来
又
脂塘干辱水璧月破清秋五佞诛新国江郎尚黑头
雌雄曲
妾夫晓出塞妾夜驰孤忠誓作干将剑一死双雌雄
连理枝
主家连理木昨夜一枝零野藤沿别树相托万年青
朱邸曲
朱邸连云起高薨荫大逵要贤能置驿独觅郑当时
高楼曲

高楼有独妇白昼弹空桑门前谁下马不是五楼倡
玉蹄騶
银脑玉蹄騶金鞭问妾家窗开桃叶渡小艇在荷花
珊瑚鞭
侬出青桑下郎来绿水边相看成自语马脱珊瑚鞭
浣女词
处女溪边浣使君溪上游使君来乞饮瓢弃在沙头
绩妇词
蟋蟀入秋堂青缸夜未央李吾今夜恶东壁灭余光
织妇曲
此曲暗用晋谢幼舆折齿事
盈盈白面娥新丝织扇罗当机不应客掷地碎金梭
商妇词
荡荡发航船千里复万里愿持金剪刀去剪西流水
又
郎去愁风水郎归惜岁华吴船如屋里南北共浮家
清塘曲
相值清塘道侬家似沫乡清塘无限好相约采芳唐
春波曲
家住春波上春深未得归桃花新水长应没浣花砑
采莲曲
东湖采莲叶西湖采莲花一花与一叶持寄阿侯家
又
同生愿同死死葬清泠洼下作锁子藕上作双头华
杨柳词
杨柳董家桥鹅黄万万条行人莫到此春色易相撩
又
长条一丈长长似紫丝缰长条挽易断五马过横塘
寄春曲
春从天上来几日到章台冯语青青柳飞花莫浪催
赌春曲
鬪草归来后开筵又赌春阶前撒珠戏独是得双人
玉镜台
郎赠玉镜台妾挂菱花盘安得咸阳镜照郎心肺肝

回文字

芳题工织素 逶意重蛟绡 应识辞家久 回文字半消
生合欢

朝作生合欢 莫作生离泣 安得并蒂坚 坚似七姑汁
缆船石

江边缆舟石 缆解不留痕 长恨芜萍草 难同结缕根
望乡台

望乡台上客 秋至望乡关 中原遮望眼 可奈燕支山
乞巧词

天上星重会 征西客未归 殷勤乞方便 灵鹊度人飞
闻雁篇

楼头闻过雁 只影不成双 一夜狂夫梦 相随到九江
系马辞

谁系西枝马 马嘶花乱飞 乱飞浑自可 莫遣折花枝
买妾言

买妾千黄金 许身不许心 使君闻有妇 夜夜白头吟
续弦言

磨角煮为胶 续弦弦在弓 誓将弦上箭 不射孤飞鸿
归客误

夜闻归客骑 玉辔鸣匣唳 唤妇开西窗 秋风响桐叶
又

江头初一潮 还从午时起 奈何荡子心 相期不如水
自君之出矣

自君之出矣 燕去复燕归 思君如荔带 日日抱君衣
又

自君之出矣 草青复草黄 思君如鱼钥 日日守君房
吴子夜四时歌【效刘琨体作】

曲尘波欲动 红心草已生 朝来夹城道 流车如水行
又

睡起珊瑚枕 微风度屣廊 夫容最高叶 翻水洗鸳鸯
又

秋风吹罗帷 玉郎思寄衣 多情双络纬 啼近妾寒机
又

桦烟嘘席暖 不知寒漏长 朝来玉壶冰 为君添衣裳

屈妇词【又名北郭词】

瓜田不纳履北郭招谗污覆釜重开日宫中杀破胡
新来子

君王有隐疾揜鼻即生嗔何处新来子樊姬不妒人
同宫子

同宫一相见不用画蛾眉井上芙蓉怨江莲共一时
阳台曲

月落望夫山高台十二鬟楚宫多妬女云雨梦中还
苏台曲

呉王张高宴台下阅犀兵高台三百里不见越王城
邯郸道

忽见邯郸道千秋万岁哀君王金不惜应筑望乡台
昭阳曲

美人初睡起内史报兰汤散尽黄金饼无寻赤凤皇
团扇歌

团扇复团扇秋风不相见隐显各有时阳阿舞双燕
白头吟

长夜白头吟新丝理故琴莫将一日意误结百年心
铜雀曲

帐中歌吹作玉座翠帘曛西陵迷望眼日莫起浮云
绿珠辞

井底生明月楼头坠宝星年年金谷草春入美人青
焦仲卿妻

生为仲卿妇死与仲卿齐庐江同树鸟不过别枝啼
小临海曲【一名洞庭曲】

日落洞庭波呉娃荡浆过道人吹铁笛风浪夜来多
又

道人铁笛响半入洞庭山天风将一半吹度白银湾
又

仙橘大如斗浮之过洞庭江妃浑未识唤作楚王萍
又

海客报竒事青天火瓮飞明朝雷泽底新有落星矶
又

纲得珊瑚树移栽玛瑙盆夜来风雨横龙气上珠根

又

海上双雷岛浑如灏灏堆乖龙拔山脚飞渡海门来

又

潮来神树没潮归神树青云里天妃过龙旗带雨腥

又

客入毛公洞洞深人不还明年探禹穴相见会稽山

又

太液象圆海金莲夜夜开水中万年月照见昆明灰

又

秦峰望东海云气常飘飘桑田明日事奚用石为桥

桂水五千里

桂水五千里春来波浪深地消青草瘴花发乳蕉林

又

桂水五千里潇湘雨气空衡山七十二望见女英峰

又

桂水五千里南风大府开象王新贡入蛟女送珠来

又

桂水五千里上有鸚鵡洲美人生遠思今夜在南楼

铁崖古乐府卷九

●钦定四库全书

铁崖古乐府卷十目录

西湖竹枝歌【九首】

吳下竹枝歌【七首】

春情【二首】

漫兴【七首】

冶春口号【七首】

漫成【五首】

春侠杂词【十首】

燕子辞【四首】

小游仙【二十首】

海鄉竹枝歌【四首】

●钦定四库全书

铁崖古乐府卷十

（元）杨维桢 撰

西湖竹枝歌

苏小门前花满株苏公堤上女当垆南官北使须到此江南西湖天下无

又

鹿头湖船唱赧郎船头不宿野鸳鸯为郎歌舞为郎死不惜真珠成斗量

又

家住城西新妇矶劝君不唱缕金衣琵琶元是韩朋木弹得鸳鸯一处飞
又

劝郎莫上南高峰劝我莫上北高峰南高峰云北高雨云雨相催愁杀侬
又

湖口楼船湖日阴湖中断桥湖水深楼船无柁是郎意断桥有柱是侬心
又

病春日日可如何起向西窗理琵琶见说枯槽能卜命柳州街口问来婆
又

小小渡船如缺瓜船中少妇竹枝歌歌声唱入空侯调不遣狂夫横渡河
又

石新妇下水连空飞来峰前山万重妾死甘为石新妇望郎忽似飞来峰【石新妇
即秦皇缆石是也】

又

望郎一朝又一朝信郎信似浙江潮床脚搯龟有时烂臂上守宫无日消
吴下竹枝歌

三箸春深草色齐花间荡漾胜耶溪采菱三五唱歌去五马行春驻大堤
又

家住越来溪上头臙脂塘里木兰舟木兰风起飞花急只逐越来溪上流
又

寶带桥西江水重寄郎书去未回侬莫令错送回文锦不答鸳鸯字半封
又

马上郎君双结椎百花洲下买花枝罨冠子高一尺能唱黄莺舞雁儿
又

白翎鹊操手双弹舞罢胡笳十八般银马杓中劝郎酒看郎色似赤瑛盘
又

骑马当轩鹄觜靴西风马上鼓琵琶内家队里新通籍不是南州百姓家
又

小娃十岁唱桑中尽道吴风似郑风不信柳娘身不嫁真珠长络守宫红
春情

惜春正是上春时何处春情可赋诗吴王台下斗芳草苏小门前歌柳枝
又

灼灼桃花朱户底青青梅子粉墙头蹋歌起自春来日直至春归唱不休
漫兴

■〈青盃〉画溪头翠水家水边短竹夹桃花春风嗾人狂无那走觅南邻羯鼓挝

又

丈人接■〈𠂇离〉白毡裁花边下马不惊猜环沈溪头买酒去高堂寺里看碑来

又

长城女儿双结丫陈皇宅前第一家生来不识古井怨唱得后主后庭花

又

杨花白日绵初迸梅子青青核未生大妇当垆冠似瓠小姑吃酒口如樱

又

今朝天气清明好江上乱花无数开野老殷勤送花至一双蝴蝶趁人来

又

南邻酒伴辱相呼共访城东旧酒垆柳下秋千间络索花间唤起劝胡卢

又

我爱东湖旧广文更过水口觅将军醉归常骑广文马不怕打鼓噤黄昏
冶春口号【寄昆山袁郭吕三才士】

今年腊底无残雪却是年前十日春骑马行春桥上路密梅花发便撩人

又

吴下逢春春思浓不堪花发馆娃宫吴山青青吴水白愁杀江南盛小丛

又

见说昆田生玉子海西还有小昆仑明朝去拔珊瑚树龙气随飞过海门

又

蛟卵兼斤传海上海人一尺立阶前娄江马头天下少春水如天即放船

又

南朝宫体袁才子更说西昆郭孝廉自是玉台新句好风流无复数香奁

又

湖上女儿柳叶眉春来能唱黄莺儿不知却是青娘子飞傍枇杷索荔枝

又

西楼美人不受呼清筝一曲似罗敷可无东廐五花马去博西楼一斛珠【一斛珠

妓名也】

漫成

四十已过五十来白日一半夜相催劝君秉烛须秉烛七十光阴能几回【一本云

劝君有酒须秉烛】

又

西邻昨夜哭暴卒东家今日悲免官今日不知来日事人生可放酒杯干【一作莫

放】

又

徐家园里野莺啼张家楼头客燕栖千金买宅作邮传何处高垣大字题

又

铁笛道人已倦游莫年懒上玉墀头只欲浮家苕霅上小娃子夜唱湖州

又

小娃家住白苹洲只唱舍郎如莫愁风波不到鸳鸯浦承恩曷用沙棠舟【舍郎一

作赧郎】

春侠杂词

金丸脱手弹鹦鹉玉鞭嬉笑击珊瑚侍儿无赖有如此知是霍家冯子都

又

花袍白面呼郎神当阶夺花不避人天马乘龙金络脑贾家贵婿正娇春

又

柘林纵猎金毛鹰花街行春银面马夜宿倡楼酒未醒飘风吹落鸳鸯瓦

又

朱提注酒酒如池太白淋漓吃不辞上楼更衣玉山倒腰间带脱金犀毗

又

蜀琴初奏双鸳鸯嶰竹和鸣双凤皇夜阑酒散不上马紫荆月堕西家墙

又

石上叶生青凤尾阶前花开黄鹄觜美人弄水百花池水洒花枝双蝶起

又

宜男草生小院西阶前锦石与人齐钱塘潮生当午信丹鸡飞上上头啼

又

凤皇城外横门道小妓军装金线袄春晖无赖苦撩人自下雕鞍蹋芳草

又

西江美人久不见手把新题合欢扇鲤书凭送相思书霸王门前水如箭

又

美人遗我昆溪竹未写雌雄双凤曲爱惜长竿系钓缙钓得江西双比目

燕子辞

宜男草生春又归美人春病减腰围何如使君堂前燕将得春雏入幙飞

又

燕子将雏春又深不堪春思似秋心东郊春入车前草荡子马蹄何处寻

又

燕子来时春雨香燕子去时秋雨凉鸳鸯一生不作客夜夜不离双井塘

又

燕子楼头入妾家燕来燕去惜容华祗应韩重相思骨化作湖中并蒂花

小游仙

元君赐觐素华台酒饮龙胎五色醅醉啖蟠桃三百颗手懷遗核大如杯
又

女郎双双白玉床对博宛在橘中央青城不取态盈袜闲赌萧家双凤皇
又

东华尘又起瀛洲十屋今添第几筹阿母西来骑白凤蛾眉相见不胜秋
又

素华殿上玉垂帘羿家妇来为可嫌河上剑翁肝胆露电光一道落妖蟾
又

麻姑今夜过青丘玉醴催斟白玉舟莫向外人矜指爪酒酣为我擘箜篌
又

莲华舟高河汉垂黄姑玉女会佳期玉清久入衙城洞莫遣成都卖卜知
又

道人得道轻骨毛飞渡弱水能千遭明朝挟至两浮岛卧看沧洲戏六鳌
又

青丘书随雷电亡尚作草木虫鱼荒问渠甲子不能纪但指绿睛双眼方
又

天上萇常宫又成文章只数老玄卿五云阁吏亦谪世牛鬼少年专盛名
又

别来已及三百秋游遍乾坤第十洲不识人家今几世明朝骑鹤过山头
又

日落海门吹凤匏须臾海水沸如炮船头处女来相唤知是洞庭千岁蛟
又

青玉参差嶰管裁管中吹得凤皇来嬴家楼头缥缈女底用箫郎筑凤台
又

卖药相逢千岁公蓬莱曾约祖龙东空留一两黄金舄不到蓬莱第一宫
又

曾与毛刘共学丹丹成犹未了情缘玉皇勅赐西湖水长作西湖月水仙
又

西湖仙人莲叶舟又见石山移海流老龙卷水青天去小朵莲花共上游
又

当时笑我去学仙汝但求金与求田不知昨夜城头鹤问此无人识墓阡
又

青旄节卫翠云駟按部东行过赤城龙女遗珠鸡卵大结为双佩赐方平

又

若木西来赤■〈山斤〉东白金城阙碧珠宫天家令急不敢住折得五花归餽龙

又

东逾弱水赤流深夜得桃都息羽旌地底日回天上去金鸡如凤自交鸣

又

金鹅葢生瑶水阴锦驼鸟鸣珠树林上皇勅赐龙色酒天乐五云流玉音
海乡竹枝歌

潮来潮退白洋沙白洋女儿把锄耙苦海熬干是何日免得侬来爬雪沙

又

门前海坍到竹篱阶前腥臊虿子肥豨■〈牙子〉三岁未识父郎在海东何日归

又

海头风吹杨白花海头女儿杨白歌杨花满头作盐舞不与斤两添铜铤

又

颜面似墨双脚赭当官脱袴受黄荆生女宁当嫁盘瓠誓莫近嫁东家亭
铁崖古乐府卷十

●钦定四库全书

鐵崖古乐府补卷一目录

荆卿失匕歌	补梁毗哭金辞
补日饮毋苛辞	冰山火突词
月氏王头饮器歌	附张宪和辞
附李费和辞	附顾亮和辞
楚国两贤妇	楚妃曲
慈鸡田	牝鸡
雄秦女休行	木兰辞
罗敷词	漂母辞
鳳皇曲	长门怨
燕燕步踟蹰	焦仲妇
铜雀妓	黄花辞
菖蒲花辞	綠珠行

●钦定四库全书

鐵崖古乐府补卷一

（元）杨维桢 撰

荆卿失匕歌

风潇潇水潏潏马嘶燕都夜生角壮士悲刀拔削【叶朔】徐娘匕尺八钅函中目

光射匕尖【樊于期首】先王地下汗如雨匕机一失中铜柱后客不来可奈何十三小儿面如土击筑复击筑壮士渐离重矐目仓君仓君亦何为博浪沙走千金椎君不见镐池君璧在水龙腥忽逐鱼风起于乎刺客死君王不用买侠才留取千金买方士【一卷作易水歌而语稍异】

补梁毗哭金辞

隋大理卿梁毗为安宁刺史凡蛮长以金多者为豪侠通相攻夺酋长相率以金来遗毗毗置金座侧对之恸哭曰此物饥不可食寒不可衣汝等以此相灭今将此物来又杀我邪一无所受余为毗补哭金辞

汝金来【叶】我今与汝辞汝辞不犀能斫我颈汝液不鸩能折我肌金谷汝劓首金坞汝焚尸金兔汝灭族金牛汝丧师故我与汝永诀誓不为安宁贪刺史宁为齐黔娄鲁荣启期

补日饮毋苛辞

劝君酒呼酒来【叶】尚方肉食有腊毒天赐我酒寿君金屈卮君不见汉家中郎丝廷毁丞相斥嬖儿吴中脱死归阿种【丝侄】者劝以日饮毋苛鬪鸡走狗嘻不则利剑刺君君莫支于乎十七客肩相随陪生日者弗能知阿种真好儿

冰山火突词

冰山不可倚冰破割尔足火突不可附火燎烂尔肉君不见魏其侯门下客独厚灌太仆太仆相引重势若绳合束身服朞功更与【一作为】结欢田相国相国席上缚骑兵首悬东市及支属魏其侯尸渭城东朝有制不可赎

月氏王头饮器歌

黑风吹瓠瓠不流冒顿夜断强王头黄金留犁搅玉斗一饮一石酥駝秋眼红吮啖生血聚汗滴石楼湿青雨【石汗盖骨髓隐语也】鬼妻扣骨骨欲磨精禽飞来作人语黄云压日日欲颓将军回首李陵台君不见汉家西风凋细柳老上单于夸好手棘门胡卢可盛酒

附张宪和辞

持尔月支头饮我虎士颈虎士饮之怒生瘰猩红酒熟黄金样淋漓犹疑血未干雄心如剑四五动倒蘸狼山海波涌帐前按剑千熊罽耳热听我歌谷蠡此杯持劝藟夫子乌能持劝武阳儿

附李费和辞

先生作月氏王头饮器歌虽李长吉复生不能斗其雄棘门胡卢盖托今反面事讎者读者不知其微费僭和之

太白入月月欲颓胡风吹度白龙堆血函模糊截仇首半■〈骨宛〉劓作玻璃杯目毗生红酒微灏戎王胸堂沃焦热青毡帐下唱胡歌三十六国肝胆裂金篦搅红红欲凝脑中犹作铜龙声千年古恨恨未平怨魂飞作精卫精君不见漆身复仇仇未复地下

义人吞炭哭

余读费辞为之击几而歌费真狐精也时鐵门和者称张宪明日费辞至宪拜之曰吾当放君一头取已作而焚之余复技痒作些月氏头歌令费和之费谢曰某气竭矣

呜呼老氏颅大如斗眼中磷吹欲腥游魂夜哭灯前走梦呼老氏颅在手倒泻一声索郎酒呜呼饮月氏酒船不倒刘伶尸酒淋汝颅胡用悲君不见左贤截落血丸顶藜蒺营邊作溺皿

附顾亮和辞

月氏王头歌古作数十篇未有能发其雄愤者及观先王之作皆是玉楼鬼不能道者发其千载雄愤为古今絕唱一时和者不许张宪而独称赏李费费真狐狸精也亮不敏何敢望费以先生之命僭和之

月氏肉碎如雪月氏颅颈如鐵快剑一斫天柱折留取胡卢饮生血冒顿老魅呼月精夜酌葡萄陇月明鬼妻蹋地号我天可汗天灵哮虎声嘶酸于乎颅兮颅兮汝勿悲我今酌汝金留犁黔州都督有血顶精魂夜夜溺中啼

楚国两贤妇

列女传楚王持金聘接與夫负釜甑妻戴衽器变易姓名而遠陟莫知所之老莱畊蒙山之下楚王以璧帛聘之不至王驾至老莱门妻曰可食以酒肉者可随以鞭棰可授以官禄者可随以铁钺遂与老莱弃畝而去

楚国两贤妇夫莱与與宁随夫婿馐牛下不愿夫婿专城居投畚却车驾挈器采樵苏呜呼今丈夫弃耕贪禄【句】粟万鍾养孥【句】孥未养身受酰菹祸及其夫【叶姑】永为二妇笑鄙夫

楚妃曲

琴论有楚妃叹七拍楚妃樊姬也余尝论楚妃之德不妬而善谏不妬者进后宫九人善谏者止王之猎咲虞丘子也古辞未及谏事惟张籍及之故吾辞亦取兴于猎云

朝游田云梦藪莫游田云梦藪樊姬谏不售矢不食田中兽妾愿王王寿考【叶口】猎贤才开伯道楚国夔龙孙叔儿非麟非虎非熊黑虞丘子真狐狸

慈鸡田【补魏公子乳母辞见列女传】

秦下令购魏孤匿孤罪族俱屠嗟慈鸡独哺雏秦令毒毒如狐慈鸡知有雏不知有狐搏我躯

牝鸡雄

列女传伯嬴秦穆女楚昭王之母也吴王入郢妻昭之妻又欲妻其母嬴嬴伏剑不可犯而止为作牝鸡雄补乐府缺

牝鸡雄秦氏熊【公谷书嬴作熊】吴王入楚妻后宫牝鸡雄把剑夜啸生悲风夫亡子遁谁适从人言秦鸡解逐鳳不知牝逐孤飞龙

秦女休行

秦氏有烈女自名为女休【叶虚】左手执白扬刀右手把乌龙笈年十五妻燕王夫燕王陷无辜取仇西山上杀人白昼衢闾吏不敢睚眦司败莫孰何【叶乎】于手杀人者杀创人者创女休岂敢避法走藏累嫂与兄使县吏解章女休自归罪丞相列坐东南床丞卿议罪拘文法故常牵曳东市头法刀利如霜刀未下金鸡衔赦出法场百男尽短一女长嗟嗟女休真女郎丈夫堂堂掩面事仇女休视之如妾妇女娼

木兰辞

木兰古辞二首世疑金柝鐵衣句非汉魏语余观二辞前辞为古后词盖又拟者之作也吾为此辞又将发兰之所未发也

金鞮鞞鼓■〈音堂〉■〈音堂〉行人且勿行木兰换衣裹戎装木兰戴金鉞鉞着鐵襦裆右手鴈翎刀左手月轮弓叶跨上八尺马轻若飞鸿翔木兰父老下无丁弟上无壮王兄【叶】木兰代父前我行我羌健儿八尺长不知木兰与强木兰口■〈足必〉跋■〈足必〉跋谁雌谁复雄【叶】健儿何草草木兰何堂堂东市斫西市斫相斫似阿若郎【杨若阿事】擒贼报信归报我国王国王赏功爵名字始知木兰是女娘女娘安用尚郎请移木兰爷娘当国王进忠良制我羌垂衣裳不下堂木兰去兵亦为妇采桑

罗敷辞【一作陌上桑】

盈盈秦氏女采桑南陌头一顾云不飞再顾水不流使君立五马招傲重回头艳歌为君发繁丝为君擗使君有妇如有■〈新上女下〉罗敷有夫非秋胡使君喜使君愁罗敷不得须臾留

漂母辞

诸母漂泗滨一母眼中识穷人盘有余馐及汝王孙竟我漂食踰兼旬王孙封王报母以千金【叶斤】丈夫养贤不如漂仁又岂知锤室妬妇杀功臣过客酹墓千千春

凤皇曲【即白头吟】

凤殊栖皇悲啼比翼不如鳧与鸡皇悲啼凤殊栖造端不能合隙终不能睽卷衣香未歇荐琴弦未绝昔日连环心今朝两分别乃知茂陵女未求沟水已作东西流

长门怨

阿娇盼美目阿娇贮金屋金屋瑶华春未老长门一夜生秋草蜀才人金百斤受金为我赋长门长门写春愁君王见之为伤秋临邛沟水东西流不知悲妇悲白头

燕燕步踟蹰

燕燕步踟蹰【飞燕善踟蹰步】飞附阳阿主燕燕尾涎涎飞宿昭阳殿啄子啄及矢誓断涎涎尾【梟其首断其手帝怒语也】十四月虹流辉望尧门方是耶非【帝以其姪踰十四月当生圣人】市犊归溷凤飞玄宫之人兮白华綠衣【燕讚班姬班姬退处东宫作赋自悼白华綠衣赋中之语也】

焦仲妇

旧序言仲庐江小吏汉安时人古辞凡千七言予嫌其辞过冗而情不伦复述此辞
刘氏有好女十三能织素十五能箜篌十六通书数十七为焦氏妇得意焦氏夫失意焦氏姑阿母谓阿仲汝去尔妇尔妇自专不受驱东邻有女如罗敷吾与汝聚如水与鱼阿仲孝母复爱妾妾爱必割母命不可违斯须仲去妇无七辜为吾谢外姆破镜毋再合断弦当再续【平声】妇感仲区区誓天日不再家【叶姑】君如盘石妾如苇蒲苇蒲绕石石不车但苦亲父亡父亡有暴兄【叶】暴若豺与狼迫我再事人不得留母堂脱我旧丝履重作嫁衣裳腰袜绣华袜耳着明月裆团扇画双鸾箜篌弹凤皇盖若市门使我掩面不得藏昨日县令媒云有第三郎今日府君媒云有第五郎金鞍玉脑马青雀白鹤舫【平声】杂彩三百端赆钱三万缗【平声】仲妇不得惧违我暴兄【叶】宁违暴兄死不违焦仲使意伤矢为焦家一姓妇不为他妇食二家水浆开户四无人投身赴沧浪焦仲闻之裂肝肠挂身一在枯枝桑两家合葬庐水傍暴姑悍兄泪浪浪

铜雀妓

火龙戕铜雀翔漳河水鼎中央魏武王安得万万寿长生铜雀宫【叶】百岁葬西冈铜雀妓不得与金银珠宝同埋藏台上六尺床床下总帐奠酒粮月十五作伎以为常更令登高台而望西陵【良】漳河水啾啾东下不回头铜雀妓漳河流试问台上妓何不殉死如秦丘

黄花词【齐后主穆后】

椒壁闼丹丘网轩接琼楼金人未成铸玉册竟为偶后裳辉锦裆伶衣乱珠黠典礼既乖违纲维荡无有百年神武基势落清觞酒嗟哉金汤固一朝拉枯朽

黄花穆后之小字也本宋钦道奸私所生钦道伏诛黄花遂入宫有幸后主遂立之为后童谣曰黄花势欲落清觞满杯酌后主自立穆后昏饮无度故云清觞满杯酌言黄花不久也

菖蒲花辞【冯小怜】

黄花落菖花开劝君续命酒金琶声若雷晋州古城铁瓮裂大人石点燕支面玉镜高台画眉未蟠蛇阵前看儿戏马上走戎装裋衣上身何短长长风起华桥日落漳河道为君始为君终菖花不如美人草

冯淑妃名小怜慧黠能弹琵琶工歌舞穆后从婢后爱衰以五月五日进号于后主曰续命周师取平阳帝猎于三堆晋州告急帝将还淑妃请更杀一围自晋阳以皇后衣至帝为按■〈繼上口下〉命淑妃着之然后去及帝遇害以淑妃赐代王达因作弦断诗曰虽蒙今日宠犹忆昔时怜欲知心断絶应看膝上弦隋文帝赐达妃兄李询令着布裙配春询母逼自杀

绿珠行

主家高楼起金谷买妾不惜真珠斛美人买得一片心不买青眉与明目手持玉笛吹凤凰誓汉箫史双颧颧楼头侍宴宴未彻甲光一片楼前雪神珠一点掷画阑化作流

星光不灭呜呼珊瑚步障裂行人吊珠在古井井中照见青天月石家妾石家哭二十四人金谷友【叶以】八驺道旁方拜履【题与九卷同而词异】

铁崖古乐府补卷一

●钦定四库全书

鐵崖古乐府补卷二目录

金谷步障歌 五王球歌

金人击球图 桃核杯歌

阿莘来操 华山高

太山高

●钦定四库全书

鐵崖古乐府补卷二

（元）杨维桢 撰

金谷步障歌

金谷水派银河流金谷峙据三神丘太仆卿【君一作居】十二楼花草不识人间秋蜀江染丝云五色紫凤衔丝中夜织剪断鲸涛三万匹天女江妃不敢惜明珠量斛买娥眉时时玉笛障中吹红鸾翠鹊飞在地香尘蹋蹋凝流脂野鹰西来歌吹歇踏锦未收风雨裂楼前甲士屯如云楼上佳人坠如雪于乎董家郾坞金成泥鬼灯一点然空齐州奴何用尔只须豆粥与萍藜不见祇今金谷底野花作障山禽啼

五王球歌

天河洗玉通银浦云气成龙或成虎金丝剪断黄台瓜萼绿五枝生五花让王不在荆蛮俗李家兄弟真骨肉醉归何处戏球场黄衣天人是三郎十幅大衾惊裂纟西风夜入金鸡障五马一龙龙化猪大■〈衤朋〉儿在黄金舆青骝万里蠹丛路雄狐尚复将雌去凉州曲破可奈何至今玉笛忆宁哥

张宪跋曰国朝雅咏五王球者多矣至吾鐵崖先生始以锦囊隱语带史断此其难也宁哥识破凉州诸王之所不及非老于史学孰能感慨至此哉

金人击球图

鞞鞞国鹘产仇赤药半吐妖狐愁夹山丈雪走髑髅黄羊紫酪熏神州丽春堂前春正好臙脂妆花绒剪草君王自作击球戏说与【一作似】郎君莫相恼蜚虎帜蟠龙裘乌纱顶换银兜鍪四垂带绶双白月玉脑紧贴金笼头袒臂交肩捷过鸟鐵【一作赤】棒旋身电光绕一阵欢声埽地来火珠迸落双华表盲骨天人赤龙须火伍要与常人殊画工俗笔不可摹漫作十国朝王图于乎五国城一丸土不为羊哥封国户麒麟脱地地一裂千古球场吊禾黍

贝阙跋云自虞阁老赋金人出塞图馆阁推为独步先生赋金人击球图脱去阁老胎骨无一语相袭金国始末此诗了之与阁老诗相颉颃奇句过之也

桃核杯歌

道士余筠谷为予道长春真人事世祖皇帝幸长春馆真人方昼寝盘桓久之始寤上曰真人何之对曰臣赴蟠桃宴上曰有征乎曰有乃袖出桃核大如盃上神之玩不去手命左右持去真人请剖而为杯一以奉上而自留其一上命置万亿库永为我家镇国之宝时馆阁先生未有歌咏筠谷请曰此我朝奇事当得老鐵史奇语以传世为补赋桃核杯乐府一解

西霞火龙躡罡风飞上万八千里昆仑宫玉衡精结万年果朔儿不敢偷春红梦中红日炎【去声】金甲隆准天人临卧榻笑问火龙何所之袖出连环大如榼雄雷走天天发威裂作两扇鸳鸯栖神珠脱胎日月破鬼斧凿窍乾坤开左扇入天府右扇留丹台七星断双虹结天狗天狼落如雪愿承汉武掌中露不染田疆咽下血于乎金瓯缺寶鼎迁鼎湖龙去何时旋八十一纪海水变桑田招霞师谈后天双栖复合十斛大瓮磅礴巔阿萃来操

阿萃来者即可汗籥罗回曲也吹之羌管被之四弦节为十有一拍始弄极慢不可节拍至六七弄渐促数为十一而止今效用李延年新声补我朝乐府是曲之盛于警大驾今鲜卑老将复用军中奏马上乐君子不无感也已

阿萃来阿萃来十有一拍拍莫催壮士卷芦叶夜吹籥罗回胡霜凋折柳邊风吹落梅龙城寒月覆如梧阴山狐狸奉首哀真人作统九垓一拍始天地开五拍六拍奎斗回合歌金槽双椽杪黄宫大弦声若雷驾鹅颈鞞■〈羊历〉胎鲜卑齐上万寿栖大驾岁还龙虎台阿萃极阿萃愁九九八十一春秋黄雾迷涿丘桃皮箎策吹陇头二十四弦如箜篌东青雕雄纠纠白翎雀雌嚶嚶鲜卑老将涕交流为君弄兜勒兜勒兜将军怒髮竖鉞鋒龙跳虎掷走蚩尤

龙府云晋乐志胡角以应胡笳横吹有双角者是也张博望入西域传其法于西京惟得摩诃兜勒一曲李延年因造新声二十八解以为武曲

华山高

思美人兮西华山我欲往兮如天难上通帝座二气之呼吸下冲龙门百折之昆仑源秦關桃林之寒焱戾于其左兮右抱万顷白玉所产之蓝田金天太白实主宰井鬼上应精灵躔巨灵一擘万古不可合首阳下有根株连云台仙掌现真迹朱衣赤须垂囊鞬明星玉女不许以肉眼见兮玉盆綠水洒不竭一匹石马谁来牵嗟你华山人不归来兮徒留连人间尘土那可以久住白云躡尔希夷眠天池注脑晞綠发玉浆渴饮饥漚莲伐毛洗髓不足较白日一暝三千年觉来招酒姆骑茅龙访子先更呼山东李谪仙搔首问青天巨灵接见媧皇前惊呼一笑轩辕之子弥明癡

太山高

巍乎高哉太山之山三万八千文兮五岳之伯万山之宗上有云官霞伯明星玉女金堂石室高重重三十六天第一洞是为蓬玄太空之上穹上帝赐以金篋之玉策司命

下土开羣蒙自从崇伯子受命告厥功至今七十二君坛壝留遗踪触石之云可以一朝雨天下封突起化作海岛十二金芙蓉三神尚有刘郎记五官不受秦皇封东方有岩名日观羊角而上千万盘屈始窥大门小户之天聪黄河西来如线走其下齐州九点烟灭蒙秦观见长安吴观见会稽周观见洛嵩圣人登之天下小似东龟蒙夜闻巨灵荡蹠西华峰流血下染洪河红嵩高不生帝王佐常山蛇恠两首而三瞳天上金乌下倒景大星僭晓芒角流妖锋鐵道人手持一雌一雄双鐵龙骑龙天關叩天语夜拜日驾五色披祥虹天封地禅礼数絶征兵三度谣嵩童博陆侯狄梁公虞渊取日扶桑东太阳当天天下白照见地下虬虱金头虫金头虫如蠖螾

鐵崖古乐府补卷二

●钦定四库全书

鐵崖古乐府补卷三目錄

崆峒子浑沦歌	真仙谣
独酌谣	湖龙姑曲
老姑投国玺	曹大家
唐姬饮酒歌	辛家女
王氏女	高家妾
武氏剪甲词	安乐公主画眉歌
桑条韦	双雉操
朱延寿妻	王承纲女
商人妻	银瓶女

●钦定四库全书

鐵崖古乐府补卷三

（元）杨维桢 撰

崆峒子浑沦歌

老子言混沌于物未凿之先凿则死矣崆峒子名浑沦于既自形之后曰不死可乎而有不死者尸解后天弄丸先天是死不死辨也歌浑沦者亡虑百十家而又求予言故复叙之为郑重其词晓周柱史之旨者郑遂昌张句曲幸出余言质之

贞州道人郑崆峒自言得道金公之棘栗蓬归来因号混沦子不识盘皇破殼之【一作分】雌雄有物先天鼻天祖一画天作公再画地作母浑沦一破不可补羿妻合得七宝丸岁费斧斤三万户道人浑沦人弗知窃笑李下华■〈真真〉儿有时中天弄金月散作万水圆琉璃浑天圜太极圈曰器曰道何纷然而况投阁子五千重草玄于乎浑沦子尔之生兮曷以始尔之死兮曷以止九九八十一曼纪浑沦不生亦不死

真仙谣

汉武帝曰天下岂有神仙耶惟节食省欲可延年耳武帝所谓仙者亦方士求诸吐

纳一丹一药之为若天地间真仙在浩劫外者非武帝所能知矣因赋真仙谣

停君歌住尔号听我歌莫莫后天有死长生可学瓶收七豕【一行】纸剪双鹤【张綽】盆花顷刻开屏女相唯诺痴仙狡狴弗之觉去寻王屋二子讲太樸丹海乌沈冰壑黄河丸裂火暴【二子石曼卿苏舜钦也石云牛尾麟角成真少神仙言路不關书苏公云丹海飞日乌玉液朝元脑昆台气候四时春紫府光阴夜如晓亦只是吐纳仙耳真仙不取】于乎后天一【一作有】死长生不可学西华倾东海涸问我在何处手持天根不盈握浩劫万万劫始胸之天几褪黄卵殼

又有一首和狄仙人曰日月西墮而东出江河东逝而西旋乾坤颠倒吾自在真仙此诀将谁传先生自言夜梦击壤老人谈诗曰身在天地后心在天地先天地自我出其余何足言鐵仙人自詫黄卵殼外非天自我出邪予谢之曰老人吾师也

独酌谣

我约月槎客去向月宫遊试辨月中物山河之倒影大树之閤浮羿妻不死到今几甲子山夷海突还纪宫中筹吾闻九州岛之外更九州岛君房曼倩不能周岂无汤桀与轩尤迭蛮迭触寻戈矛久安长治安得万岁而千秋君不见沙丘鲍乌江猴白门兔荆州牛锦■〈衤朋〉老羯金床小蠕邗沟又筑汪芒丘泪亦不能为之墮心亦胡能生许愁采石袍赤壁舟古人不与今月在古月还为今人留呼酒重登黄鹤楼

湖龙姑曲【神弦十一中之一】

湖风起浪如山银城雪屋相飞翻白鬣竖尾月中泣倒卷君山轻一粒浪中拍碎岳阳楼万斛龙骧半空立雨工骑羊鞭迅雷红旗白蓋蚩尤开青娥鬢髮红蓝腮紫丝络头双黄能神弦歌急龙姑来

老姑投国玺

梁山崩六百年后符命兴五将十侯至宰衡改汉腊颁新正五威符命走天下侯王稽首厥角崩老姑亦去号改新母称置酒未央宫谁为朱虚按剑行酒令吁嗟长乐孺子玺不得渭陵殉葬藏幽扃

曹大家

曹大家博文善著书著书岂独识闺壺祸轍使我元舅归先庐大家大家丈夫妇如何我兄固不能劝元舅白首同归死囹圄平声太后母新野君薨邓隲乞行服【太后不许以问大家大家上疏而隲引退】

唐姬饮酒歌

姬东海弘农王之妃也王为董卓所废王死时与姬饮酒别王自悲歌姬起舞亦挽袖而歌之其词有曰死生有路从此乖予犹嫌其不以死殉王而其词如此故补之

皇天倾后地颓王降庶兮汉祚衰王作黄泉兮誓相随王死胡用吾身随

辛家女【辛毘女宪英】

辛家女父书曾读春秋经岂比高家二女夜读兵辛老人古遗直议郎云言一一關

社稷吁嗟英言光父则抱颈郎君器如斗【曹丕】魏祚得之那可久【十年而崩】卞夫人絶左右【丕母】未若英言贤可后【其决锺会之必反皆英先识之明】

王氏女【武治元年】

王氏女始州人羌中老虎旁企【羌名】地朝接长安莫聚南山羣龐家大将【王】不敢嗔王氏女在虎口上马与聯辔下马与饮酒老虎卧酣上马走拔刀杀虎如杀狗王氏女真奇勲锡以崇义号夫人不数李家娘子军【柴绍妻李氏聚兵万余号娘子军会世民于渭北】

乔家妾

唐右司郎中乔知之有美妾曰碧玉武承嗣借以教诸姬遂留不还乔作绿珠怨诗寄之碧玉赴井死

石家有绿珠乔家有碧玉颜色上春花节操冬贞木金谷楼鹦鹉井一双白璧沈倒影

武氏剪甲词

武護女文皇妃【叶】弱兼厥嗣雄其夫立周七庙灭唐诸孤身服袞冕执镇圭【叶】郊祀上帝圜丘之墟于乎黜牝晨之僭洗麀聚之污复子厥辟退老椒庐何用拜洛受图禅少室颂天枢虽不剪甲神其吐诸

安乐公主画眉歌

铜鼓二鼓星如雪帐底春云梦初熟羽林千骑开杀声画眉画眉天未明结龙蟠飞鸾舞镜中人皇太女画眉不鉴长髮尼画眉画眉将何为墨书未罢斜封旨血浸三郎三尺水桑条韦按史伽叶志忠曰顺天皇后未受命天下歌

桑条韦

于是上桑韦歌十二首请编之乐府皇后祀先蚕则奏之余惜后晚年欲遵武后遗辙遂陷逆妇为赋桑条韦补诗之刺云

桑条韦着翠衣【后服】开鬻馆纛蚕丝顺阴配阳立坤仪胡为乎牝乘雄黥面牝雏飞笼【婉儿】小鹦折翅栖桑中【武三思】天子不敢令墨勅行斜封执法不敢言宫苑夺农功隆庆池相王府【睿宗五子皆生于此】云气成龙亦成虎手提三尺正天纲【临淄王】一夜天星落红雨【韦氏宗属诛戮殆尽武氏襁褓儿无留者】桑条韦枝已折叶已稀上阳不可宅飞骑不可归天戈取血不衅鼓全祭定陵陵上土【中宗】通化门前衰布奴小白竿头画眉女【宗楚客衣斩衰乘青驴逃出通化门门者斩之引图讖使韦氏革唐命者此人也】

双雉操

晋王以练■〈糸斤〉刘仁恭父子凯歌入晋阳献太庙自临斩守光守光曰死不恨然教守光不降者李小喜也王召小喜证之小喜嗔目叱守光曰汝内乱禽兽行亦我教汝耶王怒其无礼先斩之守光曰守光善骑射王欲成伯业何不留之其两妻李氏祝

氏让之曰皇帝事已如此生亦何益请先死即伸颈就戮

双雌雉锦绣裆朝呼凤皇侣莫宿鸱鸢房两雌角角声稠将晋阳网艾如张小喜鹊子先飞扬一雄欲苟活两雌誓溘亡于乎宁为两烈死白刃不活金笼异姓王

朱延寿妻

朱延寿之妹为扬行密夫人行密狎延寿延寿怒阴与田頔通谋谋泄行密诈为目病谓夫人曰吾不幸目疾府事当悉以授三舅夫人以书召延寿延寿至执而杀之延寿赴召时妻谓曰此行吉凶未可知可日发一使以安我一日使不至妻曰事危矣部分奴仆授兵守门候捕骑至至则集家人聚宝货火焚府舍曰妾誓不以皎然之躯为仇人所辱遂赴火死

夜闻目眚子肺腑变仇讎英英朱氏妇烈气横斗牛百口同日死一燎焚高楼伯姬录尔卒谁执唐春秋

王承纲女

蜀军使王承纲女将嫁蜀主闻其美色强取入宫承纲力请之蜀主怒流于茂州女闻父得罪自杀

王客女春花面璞玉躯青年已许东家夫如何君王乱礼法合欢重馆双罗襦感君恩侍君酒但念高堂父与母愿君知妾心使妾东家奉箕箒君一怒父万里魂飞鸾刀逐父死不殉牵羊秦国鬼【蜀主降封】

商人妻【天福三年】

楚顺贤夫人貌陋而治家有法楚王希范惮之既卒希范始纵声色为长夜之饮内外无别有商人妻美色希范杀其夫而夺之妻矢不辱自经死

商人妻身栖栖家住湘累湘水西君王昨夜杀无罪良人白日归黄泥妾非野鸳鸯生死双凤皇书寄回文锦臂纒红守宫【叶】良人为我死我为雌雉经【叶】于乎司马后真犬羊甘奉巾栉穹庐王【晋后羊氏归刘曜事】

银瓶女

宋岳鄂王之幼女也王被收女负银瓶投水死今祠在浙宪司之右

岳家父国之城秦家奴城之倾皇天不灵杀我父与兄嗟我银瓶为我父缢縶生不赎父死不如无生千尺水一尺瓶瓶中之水精卫鸣

鐵崖古乐府补卷三

●钦定四库全书

鐵崖古乐府补卷四目錄

雨雪曲

陇头水

折杨柳

童男取寡妇

上陵者篇

三妇词

饥不从虎食行

丈人乌

鼠制虎	墙燕
君马黄	吴宫燕
借南狸	鐵城谣
折逃屋	门生灵
山鹿篇	四星谣
揜抢谣	石郎谣
遊陈氏园有感	小姑谣
卖盐妇	天车诗【并序】
拟战城南	磔鸩
拂郎国新贡天马歌	綠衣使辞
桃花犬	祀蚕姑火龙词【并序论】
冯处士歌【并序】	桐卿俊公子

丁孝子行

●钦定四库全书

铁崖古乐府补卷四

（元）杨维桢 撰

雨雪曲

祖穆天子黄竹诗陈后主与江摠皆有是作今又以刺武氏

天苍苍地茫茫二月三月雪滂滂雨我黄竹湿衣裳天子不在黄竹乡天苍苍地茫茫武墨儿高冠大履据堂皇唐家臣子三月以为祥

陇头水【一曰陇头曲汉横吹曲之一也】

陇头水交河津东行九回坂西通月氏东达秦贰师将汉家杰手摩龙泉七星灭此身未报主君仇衅妻再铸千金钩精诚岂识征夫侯

折杨柳【鼓角横吹曲也】

折杨柳杨柳不可折杨柳条十丈长与君系马青丝纆阌支妇剖黄鼠劝君饮马乳杨柳声作人语杨柳枝作人舞

童男取寡妇

童男齿十六寡妇六六年俯就寡妇妃还受壮女怜壮女拊膺蹋地呼天俾妻鬼夫【鬼夫指童男出征死】宁作生口老死不传火风起烧野田野鸭逐胡鴈胡能牵连飞上天【演紫骝马辞云野火烧野田野鸭飞上天童男取寡妇壮女笑杀人】

上陵者篇【宋乐志饶歌十五之一也】

步出城西關松柏郁盘盘道逢上陵者手指西陵田借问墓者谁大将墓衣冠大将非战死军中答刺罕健儿啖人鮓无骨赐桐棺

三妇词

大妇善主馈甘旨出中厨中妇善调箏清歌似罗敷小妇似小乔中夜读兵书丈人不复乐起去防胡

饥不从虎食行

西方有白额虎东方有苍头狼太室为尔宅孟门为尔场饥以人为糗渴以血为浆食尽食万俵自矜无对当无数自相啖相雄不能两强朝食其子莫食其妃况弟况兄【叶】党从皆灭身随之亡惟有慈乌喜鹊噪其四旁君不见博浪椎淮阴胯两人未遇时其事足悲咤饥不从虎食倦不息狼舍待时以售如藏待价刘季得之天下王项羽失之国不霸

丈人乌

丈人乌飞入丈人庐聒聒鸣座隅国人恠尔乌告凶不告喜丈人爱尔乌献忠不献谏命尔曰忠乌尔噪介推屋介推不受禄尔噪慕容城慕容危受兵维北有鸮觜不啄恶维南有多角不触罪永言忠乌誓死直弗谏展矣丈人克刚克仁惟刚惟仁下有直臣惟直臣是容人莫不穀我又曷凶君子作诗惟以告忠

鼠制虎

上海民有武断商舟者曰河虎虎劫商财欲溺商于河商抱虎同溺虎死商泳而去铁史闻之为作鼠制虎

河之虎莫孰御河之鼠亦莫余敢侮虎一怒鼠无生鼠一怒制虎死河浒浮云蔽青天火风卷后土孰识鼠冤苦鼠冤苦诉诸河伯府河伯为我告天不生此河虎

墙燕

慕容辞曰愿作墙内燕高飞出墙外慕容本名■〈垂夬〉以讖去夬名垂大元八年称燕王墙里燕不出墙墙外旗竿如插檣墙里燕飞出墙不使枉杀墙外百万黄口鸽墙里燕何堂堂垂名夬称燕王

君马黄【古乐府有君马黄骢马驱二曲】

君马黄当风嘶路旁關山不惮遠君命重有将大剑带陆离千里歌载驰路幽川谷陞日宴行者饥下马知马劳上马忧马迟马迟竟何罪君命不可违

吴宫燕

此题演鲍昭空城雀语也青鸟遠食玉山禾胜吴宫燕无罪得焚窠

吴宫燕秋复春饥食玉山粒渴饮玉池津木魅吹火火及尔巢焚尔身不知青雀子飞去衔红巾【此伤丁未九月九日事亦一代诗史】

借南狸

此题亦本唐人苦哉行有曰彼鼠侵我厨纵狸受梁肉鼠既为君却狸食月须足今狸则又异于是矣

北狸不捕鼠为鼠欺鼠作妖【句】人立豕啼媪责狸不职借南狸假虎威鼠未捕翻我屋上瓦倒我厨中盆与罍【叶】食饱求媪雌雄匹之咋死媪狸与鼠同嬉乌乎媪

小不忍大祸遗

铁城谣

张司业有筑城词嫌其啾缓无沈痛迫切之警今补之

蒸土筑城城上铁北风一夜吹作雪君不见铜駝關外铁瓮堆中填白骨外涂血髑
髅作声穿鬼穴铜駝崩铁瓮裂

折逃屋

折逃屋屋基生秬黍农拔稻黍投砾与鹧五种不敢入土孔谦竿尺到田所

问生灵【续聂夷中乐府】

金椎碎铜仙火窑烧石佛天子问生灵生灵消鬼卒【张道陵事】天上光明光无
屋照突兀愿照屋下坎再照坎中骨

山鹿篇【续张司业乐府也】

山头鹿距踉踉【上声】目瞠瞠【上声】田租未了压盐租夫死亭官杓头杖夫
死捉少妻拷妻折髑不能啼妻投河作河妇狱丁捉白头母

四星谣

西星白东星黄南星鴈北星狼赤燿不敢怒威灵不敢仰招距不敢拒叶光不敢抗
况尔罗侯曜向午奸太阳太阳剥未复光道日依依太山有巨灵目覩哭扶桑手取甘泉
水为日洗重光明堂亮太阶平【叶旁】黄白泡灭雁狼磷亡

揜抢谣

揜抢星揜抢星夜夜西伴长庚明煌煌火龙东未升揜抢经天掩阳精李淄青胡不
庭阳谷倒戈太行假兵揜抢夜半雨血齐城金鸡喔喔东方明【李淄青师道阳谷太行
事见刘禹锡平济行】

石郎谣

南山石郎隱蓬颗将军遠适南山下弯弓射石石郎怒生火石郎告将军猢戴汝髑
蚁穿汝踝家有鬼妻廐有鬼马不知石郎长年者长年者石马戴郎不称殇石妻望郎不
称寡

先生有石郎词补吴乐府孙皓事辞云石三郎十丈长石印生文章天下太平今适
当加印绶石郎白发丈人黄衣裳

遊陈氏园有感

陈家园野塘基千金花锦地千年子孙期歷岁未半百池台生櫓【音旅木自生也
】葵红楼在西家无址遥相移主公规戒石草中字离离妾流厮养妇客散屠沽儿尚有
庭中树高蔓女萝枝飞来双燕子岂识春风悲嗟我陈家园盛衰固有时我闻陈主公义
侠犹见推挥金周所急解佩酬相知君不见西家齷齪子生女作门楣娇客灭门户重令
后人嗤

小姑谣

小姑失母年十五大嫂育之嫂如母小姑急嫁嫁蛮郎双鬟私插金钗股大嫂泣血告小姑汝祖仪同父上柱如何世阙不对当失身去作蛮郎妇汝贪蛮郎多金银宁嫁华郎守贱贫蛮郎金多不到老华人虽寡终吾身小妇不聽大嫂诫蛮郎战没羊罗寨五丁一夜发郾坞官籍黄金官估卖小姑还家嫂怒嗔弃置弃置同市门嫁衣重绣金织孙今年又嫁乌将军

卖盐妇

卖盐妇百结青裙走风雨雨花洒盐盐作卤背负空筐泪如缕三日破铛无粟煮老姑饥寒更愁苦道旁行人因问之拭泪吞声为君语妾身家本住山东夫家名在兵籍中荷戈崎岖戍闽越妾亦万里来相从年来海上风尘起楼■〈舟召〉百战秋涛里良人贾勇身先死白骨谁知填海水前年大儿征饶州饶州未复军尚留去年小儿攻高邮可怜血作淮河流中原音信絶官仓不开口粮阙空营木落烟火稀夜雨残灯泣呜咽东邻西舍夫不归今年嫁作商人妻绣罗裁衣春日低落花飞絮愁深闺妾心如水甘贫贱辛苦卖盐终不怨得钱余米供老姑泉下无惭见夫面君不见绣衣使者濶河东采诗正欲观民风莫弃吾侬卖盐妇归朝先奏明光宫

天车诗【并引】

丁未腊交戊申春三月霪雨不休农以潦告官修围岸迫农车泄涝农力竭而潦不退有黄髮老髯来谓农曰汝车力倍而功寡吾教汝车力不劳而功倍之索巨竹二竿刳节交两首尾饮如口注农家水龙皆阁不用农惊问其神髯曰此阴阳升降法也余读张让传注渴乌云为曲筒以气引水上下天车引水即渴乌之引也郡守某过余言其事谓之天车请铁崖纪以诗诗曰

百日漏天瓠河决高丘十丈蛟龙穴髯星降世教天车刳尔雌雄两龙节胶泥琐口如折筒天窍地窍中相通疲氓拜舞赛神教喜气上天成白虹岸干水恠支祁走海底珊瑚拾星斗坐令垫土成寸金丈尺官来履丘畝我闻阿香阁雷车农车巧运脱殼蛇如何天车阅天巧马钧【造水车魏国人】不泄三农家九重帝车运北斗五风十雨调大有我愿天仓红粟朽农食冬春饮春酒和我歌击壤叟

拟战城南

昨日战羊逻堡今日战牛皮航王者有征而无战胡为日日战血腥锋芒篁竹之丁萎鸱张上山跳跟山鹿獐将军马无昆号砚安能为之陆相梁昨夜将军获生口什什伍伍童及叟问之半是良家儿贼中驱来帕红首五花劔子牛头神五十八人同斧斤鸟鸢飞来百成羣不得衔啄飞去野水濱乃知当街割啖人须臾白骨堆成薪【是日民兵食人殆如狗彘】于乎君王子民天地人忍使天地杀毒伤阳春呜呼忍使天地杀毒伤阳春

磔鸩

鸩出蕲州黄梅山状类训狐声如击腰鼓巢于大木颠巢下数十步无草生晋制鸩

不得渡江有重法石崇尝得之以与王恺司隶傅祗于恺家得此鸟奏之宣示百官烧于都街蕪有进此鸟者以夸罕见当有傅司隶付之火刑以示灭恶故予赋磔鸩诗

蕪州鬼鬼来恶蕪州鸩鸩何凶【叶兴】声如万腰鼓百鸟不敢鸣委地一片羽百草不敢生如何崇家栅养相夸矜司隶忽上奏焚灭不留形秋官司天法杀物自有刑啧啧驱我嫉■〈分佳〉■〈分佳〉劝我畊【啧啧■〈分佳〉■〈分佳〉皆九扈鸟官】天何生尔毒毒作人中兵我愿天悔祸仁凤下虞廷

拂郎国新贡天马歌

千金骨五花毛虎脊龙鬣尾蒲梢神如飞龙气如猊初来炖煌祁连之远郊双鸽迸落独鹞起急势直欲追飞鹞天驷精青海杰羁黄金络明月未栖天子十二闲孰得人间贮金埒呜呼渥洼之产宁徒劳图形已诏韩与曹伯乐光寒夜寥閬青鹤一声箕尾高【伯乐星名】

绿衣使辞

绿衣使朱冠纓西来万里陇山青金精气清徹直言语分明藏不得房中秘人不知近窃宁王玉笛吹殿上儿老莱戏十幅锦绷摇虎翅皂鷗不语君王私拜尔君王绿衣使桃花犬

邑吴氏仲衡家畜犬病踣子能衔食哺其母母死葬小山下有花开如白凤仙人因称之为孝犬云

昔桃花孝义闻天家今桃花生子在吴家桃花子母病踣不起三子者累累若悲啼有一子衔食哺母母食之子始出驰一去复一来眠母左右不一离吴老人寿期颐五叶孙斑斓衣门前荆树不分枝柱下并蒂生灵芝吴家孝慈及草木况尔桃花为有知喔喔泉獍儿泥涂我宫室荡裂我四维风俗日坏坏不支歌桃花作家庆吴家儿当执政桃花牲化泉獍

祀蚕姑火龙词【并序论】

余尝论蚕有六德衣被天下生灵仁也食其食死其死以答主恩义也身不辞汤火之厄忠也必三眠三起而熟信也象物以成蠶色必尚黄素智也蠶而蛹蛹而娥娥复复卵而蠶神也此六德也人灵为倮虫之长食君之食衣君之衣乃有脰生灵之膏卖君父之国卒不得其死者其不愧火龙乎因赋火龙辞四章补乐府之缺

火之龙兮云弗从雨弗降【叶】三眠始三眠终 火之龙兮桑以穀丝以腹蠶以屋象水火兮以金以玉 火之龙兮蛹以蛾蛾以卵卵复化【叶】龙之神兮实多惟龙之神兮有大功于人又杀身以成仁狗道而忠益信 火之龙兮其节甚高彼麋爵者谁兮生宠死则逃剥民之膏粥人之国而死与叛鬼曹火龙德德可褒

冯处士歌【并叙】

富春冯正卿氏四世不分其曾大父冀为宋德佑死节臣正卿者才而贤当元末不屑仕伪众啧啧然以处士称之丘园科屡起处士处士絶之曰予幸有一庐一区林下可以

避风雨田一成在郭外可以给衣食学圣人之道者可以自乐不愿仕也且仕荣利禄隐乐贞素苟以相易彼此两乖吁处士正卿其可谓逸而真者欤故吾号之曰贞逸而为之赋诗曰

星台下桐庐阴曰有节士冯氏之家林后三叶五丈夫子玉琳森曰正卿者长身而美髯【叶壬】风局孤古体貌疎且沉家不失箴里不失任贫不屈富不淫有余推与人矧肯要爵禄心阙下足终南【叶吟】凤皇引高神龙深深【音心】处士贞逸退如处女古井心嗟今之士科隐丘事王侯行无补阙言无裨谋惟禄食是媒诡贞而佞诡逸而遂以为吾人忧放而返也涧患岳陇羞闻处士风其不泚然在颍岂吾人俦

桐卿俊公子

古什一首钱濮敬之荣上司之任

俊公子二十忠义俱杀贼不受赏务在安邦闻使者宣条约来试匡君畧调官乡县中狴犴庀鎖钥此气与秋高丰城掘宝刀狱空元有象门櫓鹊来巢

丁孝子行

孝子兰刻木肖母颜木有神痛相關况我孝子有母上堂问安否母胡为双目瞽母瞽扣壁行行聽孝子声孝子泣母舐母目何时仰见天日星朝舐瞽莫舐瞽一日二日百里程母瞽豁然而月明邻里交相贺母如长夜再生明孝子名上达天聽华表柱为孝子旌叶牟【出诸暨志】

铁崖古乐府补卷四

●钦定四库全书

鐵崖古乐府补卷五目錄

大明饶歌鼓吹曲十三篇

●钦定四库全书

鐵崖古乐府补卷五

（元）杨维桢 撰

大明饶歌鼓吹曲十三篇

濠之涂山自五代周世宗尝见王气凿其地絕之今越五百年而王气复还圣人出焉为生民主为圣征启第一

于王气涂之冈五百祀皇陵藏火流乌星流虹驾生圣人应天祥圣人生六合一统天下昌

右圣征启九句其七句句三字其二句句七字

妖术弥勒氏聚党以万计据汝颖蔓延河洛为汝阿弥第二

汝阿弥言语侏离复兜离妖诵胡膜干毒师蜂屯蚁聚亿亿万摇首枯舌乐不疲金银城鐵为■〈捷，金代才〉汤为池北踞河洛南驱淮老獐野鹤弗能支大明帝厉虎旅拔龙飞手把黄钺相招麾元运絕弥何为筑京观究之际荆之垂拨乱反正圣武赫戏

大明烈烈开皇之基

右汝阿弥二十三句句十二句句三字其四句句四字其七句句七字

王师起临濠收义兵驻南谯平河阳遂南渡为天下所推戴郊天登极为临濠武第三

皇皇帝肇迹濠之壤【平】上天黜元命命帝靖四方神兵三千投槌渡江基建业定南京【叶】大兴问罪师天戈剪妖狂妖狂溃崩【叶】赫烈我武扬系颈阙下大明朝贺开明堂元主大去国闽广并来王皇帝神武越五帝咸三皇皇皇万国宾日出日入土普为大明臣制礼作乐圣化钧大一统业万万春

右临濠武二十二句句四句句三字其四句句四字其九句句五字其三句句七字其二句句八字

长鎗氏何吴俞刦元将刘九九夺睦城民大溃人相食不聊生王师剪平之为三蛇长第四

三蛇长一蛇擅雄王上掩三日生妖芒羿鸟毙弯弓无人落揜抢血人为浆肉为梁交结■〈彳考〉猱恣跳梁帝闵下土命将一日平【叶】收其帑实夷穴藏截蛇首刳蛇肠祭民社主反民井灶还丘坑

右三蛇长十有三句句三句句三字其一句四字其三句句五字其五句句七字其一句九字

元末伪汉陈友谅据江广水犀之众薄我城下天戈一奋追北鄱湖上友谅殪于矢为犀之穷第五

山倾峩【峩峰抚州山名】水翻鄱旗拏黄龙鼓考鼉坤轴震水犀列以阵楼櫓层层突而蜃皇赫怒血漂刃不用命斩以徇鐵钩鎖扼艨艟辟强弩开神弓老犀晕火角生风流星一矢贯尔额与胸老犀穷小犀夜泣蛟人宫

右犀之穷十八句句十二句句三字其四句句七字其一句五字其一句九字

伪吴张士诚由淮据浙僭国于吴门命将讨之介弟士信中礮死士诚投首降为双虎殪第六

江为障湖为池两虎赫赫奸天威天兵东下跨池与障平如砥【平】兵十万威武宣红帕锦股偃草前暇以岁月喘以延收残丁婴孤城穿城礮机若流星小虎粉首大虎摧爪翳两睛齐云火天骨肉焦冥天子好生一鸡一犬不汝兵粮尽矢竭开關输平羣臣鱼贯归大明大明帝义之断仁之成

右双虎殪二十四句句九句句三字其七句句四字其八句句七字

方氏珎凭温台明三州竟东海命将平之俘至京师为东海鲸第七

东海鲸鬣插鐵牙如雪山眼如月前驱虎头鲨后挈三足鳖尾一掉天纲崩地维缺吞三闽啖百粤飞涎喷沫弟兄作穴岩潭生子孙天吴弯弓弓靶折四海波涛尽流血东皇太乙乘鱼从霞长纶臣饵羈縻钩加渔彭蠡猎黄池鲸亦穿腮京口来【叶】京口来

游不动化为鰲空噉喙

右东海鲸二十六句句十三句句三字其五句句四字其三句句五字其四句句七字

元将镇闽不克守土豪友定闭關抗王师口将破之俘以告庙为定八闽第八海上将军神骑还乘胜卷甲斩闽關阿难气虓虓老鹞语绵蛮土豪据土孰与京将军将命扬风声豪一败走连营俘以献庙功用铭闽山奠闽水清

右定八闽一十一句句三句句三字其二句句五字其五句句七字其一句六字

淮豪王信据山东大将取之不以师羈其父与兄而信降为下山东第九

益之都鲁之邦元不纲兵强马壮礲礲冈梗我王化山输海贡隔梯航狡狐三穴跳踞贪狼王师薄城筑我受降骈首就缚父与兄弦歌之化复我邹鲁乡

右下山东一十二句句三句句三字其五句句四字其三句句七字其一句九字

秦侠李思齐据關中已而私窃名字王师招之解甲来降为招關中第十

太原李继忠襄京兆李王咸阳唇齿相依势相望构谗煽虚撼金床王纲偏圯弗擢上弗急君父同盟不相援征兵關中伐太原大丞相偏将军士马百万蹂燕云国已墟關来从尉之陀窳之融

右招關中一十八句句十二句句三字其四句句七字其二句句五字

元末河南王扩阔守汴大兵抵城阔遁遂收汴京为汴通河第十一

邗启沟汴通河河之王铠仗山积血流波前徒接战尽倒戈二三主将弁峩峩输忠竭节心靡他以彼取此类虞罗由汴入泝入红螺嗟政不纲可奈何自底灭亡可奈何

右汴通河十一句句三句句三字其八句句七字

王师由海入燕元主大去其国全城来归不血一刃为统幽蓟第十二

国运倾六师驻那咤城龟兹主走深京宣明诏许厥成壶箠筐筐左袒迎封籍府库奉大廷大丞相舍于野【叶序】克大国匪余武天子龙骧士貔虎问其寡派毋恃杀掇秋毫无犯民按堵民按堵振旅旋钩丽冒胤未殄灭【叶】大将军请戍邊偏将踰葱岭越祁连追亡逐北万五千抗大旌悬絕幕【叶】天子喻书通玉帛胡宗□□来沓译

右统幽蓟二十九句句十八句句三字其八句句七字其二句句四字其一句五字

伪夏明珎负地险久据四川天子息兵之次未忍加诛先谕之以辞为喻西蜀第十三

陇云寒陇水干天使晨入荆门關右扼熨左控秦巴蜀限峨岷伪夏昆强项不来宾元戎闡皇威民何罪肝脑糜一札西去如星驰彼元之微弃身独夫剪与我絕忍及尔孤告冉厖束斯榆檄邛笮上版图剝包蒲受正朔玉垒峩■〈山上眉下〉我城郭沱潜三巴我塹壑誓蚕丛铭剑阁

右喻西蜀二十六句句十五句句三字其四句句七字其三句句五字其四句句四

字

会稽杨公廉夫登高科四十余年以文鸣当时方四海有兵事高居松江山中一日聘至金陵论定礼乐乃成饶歌鼓吹曲称颂武功昔柳柳州谪官荒徼以有是作方之于公目睹行师之次第而论撰于著作之庭者大不侔矣临川危素敬书

鐵崖古乐府补卷五

●钦定四库全书

铁崖古乐府补卷六目录

江西饶歌【二首】	大将南征歌
小万户射虎行	虞丘孝子辞
髯将军	铁骨搭
韦骨鯁【并序论】	舒刺客【并序论】
赵公子舞劍歌	李公子行
盲老公	铜将军
周铁星	蔡叶行
金盘美人	春晖草
凝香阁诗【有序】	毘陵行
杵歌【七首】	刘节妇
雉子班	黄鹄曲
翁氏姊	濮州娘
处女冢	

●钦定四库全书

铁崖古乐府补卷六

（元）杨维桢 撰

江西饶歌二首【见东维子】

陈友谅起兵杀倪蛮子据龙兴辨章阿里温沙公宪金察伋公合兵破之龙兴始平江右诸郡无不欵附至此而武功成作龙兴平

繫龙兴藩西江二畝章国骏厖江有砥柱胡为鸿流泽勅蛮效尤蠹螿内江三台暎太微国士俱无双王旅啾啾钲鼓攢攢天威震赫羣凶攫八郡望风咸来降武功既成毋从从圣人南面殿万邦

右龙兴平十五句句三字其三句句四字其三句句五字其四句句七字

龙兴陷日宪使刘夔怀印埋土中土生瑞木一本察伋被命为金宪丞购印于瑞木下掘得印来归伋得印施诸移文遂成恢复功为银章复

维白金有章维国之光九鼎既峙翕元化以张大冶范金吐景耀铍■〈虫留〉螭纽龟鸾翥鳳翔官臣实司之植我皇纲孰函且藏启发祲祥操挈系政柄繫德是将符节

允合人文昌荡攘凶顽时乃康与国咸休万年膺天庆

右银章复二十句其二句句三字其十三句句四字其五句句五字

大将南征歌

美河南王察罕也

大将军将天讨出南征文如阿阁凤武如牧野鹰兵行司马法漕转屯田丁鹿山放
麀万众泣虎穴取■〈虎兔〉千人惊东屯西屯露书布南溪北溪壶浆迎蛮奴授首
子猷城三危送欵孤竹输平蓝之山截海断峡之水吞湘汉大将军持庙算直向
刑塘筑京观嗟嗟小蛮触尚尔争雌雄将军大势破竹下拾土补地裂中国长城
无再坏昆崙天柱无再折盘石永安金瓯罔缺我颂摩崖千丈碑大字如斗光夺月

小万尸射虎行

美庆元镇帅金驹儿也

邊城秋气劲折胶草枯燎发风萧萧将军校射出细柳马上箭落双飞鷗须臾吼地
穷兽急将军匹马电弗及疾蹄迸落冲虎过白羽穿喉虎人立将军身不六尺强一怒
万夫无敢当先皇赐名名拔突部下材官争蹶张画工亲见编须勇急阵梢冈浩呼
汹目光落地已化石将军生气毛髮动君不见桃花岛阜树洋乳孙哺子人为粮将
军一死不可生东海黄公愁夜行

虞丘孝子辞

顾亮会稽上虞人也父珪倡义兵拒海寇与虏邵仇至正戊戌冬迈里古思引兵东
渡珪为虏所害亮时年十五每有推刃于仇之志而未获遂也阅去十余年过余道
其事挥涕哽咽怒髮尽竖予悲其志为作虞丘孝子辞以继古乐府云

虞丘孝子父仇未雪长剑拄頤藪草在舌夜诵读漉篇涕泗尽成血于乎头上天戴
昏晓千金去买零陵之匕刀虞丘孝子心始了

髯将军

美功将董叅政搏霄也

髯将军将之武相之文文武长才不世出将军兼之今絶伦阵法本天地兵机侷
鬼神八门遁丁甲六花散风云楼船旌旆龙矫矫云關金鼓雷礮礮水犀枝战悍
鲸帖陆兕出神妖狐奔风尘瀕洞翳日月紫髯一拂开朝昏上马谈兵被裘带下
马降礼陈壶尊于乎昔人恨随陆无武绛灌无文将军之武平祸难将军之文
焕经纶髯将军受斧钺承华勋净除国妖雪国耻制礼作乐归相天王尊

铁骨搭

美江浙省铁宣使也

铁骨搭伟鹞砂性如獬豸口如鸦仰见太阴剥食欲挟匕上天劊妖蠹俯见海扬波
誓拔快剑水上断蝮蛇才雄志大无位可施展乃令行人走使匹马无停挝南藩
大吏一月二十九日醉藩职弗理莫敢辄玼瑕骨搭北上见官家官家门南事一一
叩陛下陈治

忽谈忠邪天子为点首百官尽惊呀御史结舌惭辅车有附和无齜牙于乎骨搭者古之汲直无以加天子何不唤取归南衙下为百司司白简上为天子持黄麻

韦骨鲠【并序论】

韦名清江陵人性强梗好怒骂人号为韦骨鲠省台大臣有过辄昌言之无忌伪张氏大弟夺浙相位相僚曰寿曰的拜其伪太妃已而复夺台印章大夫普持印未决清走普所属语曰大夫尚不能殉印一死耶普死之清时为察胥独航海至京师上书言寿的丧节普完节及陈便宜二十事上不报徒步归江陵故里吴主欲仕之清力乞骸骨侍亲遂落魄金陵市以诗酒为事母死后服道士服游五岳名山云予以清非公卿大吏而嫉邪愤世有祢正平之气节求之于妾妇世岂不在可咏之列耶为作韦骨鲠诗

韦骨鲠性■语轧■〈旱戈〉【干】眼中有周公孔子舌底有龙逢比干见无义汉不律官怒癭突项髑芒刺生肺肝【去声】敢向汉遮栏驾策不向秦鑽【不仕伪】世人不识之峩独角巾如豸冠痛吟荡阴里悲歌清泪滩左旋右衡万妾妇朝梁莫晋千痴顽弗弧弗刃劫白日■〈金屈〉郎摸仿同一虬【奸同】走穀下出台端力陈悖逆不赦金鸡竿败红一阵逐风去木馱万驾螺螄盘裼来秣陵市佯狂落魄酒浇舌本黄河干我有孤竹笛和君独丝弹神仙狡狴只在吾人间倒骑一笑与尔共访西华山

舒刺客【并序论】

沅州有奇男子陷贼中佯俘受伪命阴谋刺伪主大享宴中匕首业出袖不幸不中讫能流渰以免絶似博浪沙事伪主淫杀疑似百十人已而间行归荆溪山中说豪杰数百辈从之归正于江浙省相府贡礼部为作歌诗令予志其事予始知奇男子舒氏而志名明年志覲京师予徒乡贡忻【一本忻下有忻字】回京师持其状来求书余读太史公刺客传未尝不悲国士之志志穷而为刺也议者谓传刺客非春秋旨盖尝论刺客有义有不义辨为国报仇为私人戕正人此义不义辨也刺客有五吾取其三人沫持匕首劫盟坛上管仲不以为非而归其侵地让挟匕首入涂厕中赵襄子义其人而卒释之轲挟匕首亢图为丹太子驰入仇国图穷匕见而卒受戮死君子犹以义侠予之嘻刺客若三子者可以翩豹之例书之乎五百有余年而曹操遣客至先主座所见诸葛而遯此真珠靡耳又三百余年而唐有曹王俊客能取其主仇谢佑首为溺器义士快之又七百年而今有舒志人又咎其不得为曹王俊客此以成败论也吾取义烈于志不计其功成与败也太史公曰义或成或不成其较然不欺其志岂妄也哉吾以是取志予既为志录其事志自京师得赏爵回来见曰先生为李铁鎗作歌至今铁鎗有生气志拙事幸见录于铁史再幸得先生歌虽袞冕无以喻荣予与壮士饮酒酒既酣遂为作壮士歌一解使左右击节合噪相和壮士大喜出佩剑作浑脱舞而去

舒壮士智如张子房胆如赵子龙神州地入黄旗东壮士手挽回天功探虎入虎穴壮士沃焦心火热怒潮一卷石头城匕尖已带乖龙血闇中三耳走鬼工百日淬匕一日穷座中火位剉机肉壮士灭迹孤飞鸿柯坛劫盟地还鲁舞阳小儿何足数博浪沙头力

士归为韩报仇仇必虏于乎大将军万夫雄赤心报国为先锋如何马头交剑不斫贼却留小惠夸丁公

赵公子舞剑歌雪

轩左相求奇才剑客公子侍予游其门席上作舞剑左丞命歌之其人名信奉元人也身長九尺有文武畧

赵公子千人英读书万卷愁无成负此长身九尺如长城雪芙蓉玉青骢我将挟尔成大功腰纏十万欲何往直上北台观虎龙道逢铁笛僊把酒九峰前酒酣为我拔剑起作浑脱伎白虹遶地乌风旋躩然指天天为穿天狗墮地顽星坚老铁酒酣为椎鼓壮士冲冠髮倒竖老增撞斗何足为鸿门突立卫真主赵公子千人英为君酌酒肝胆倾忍见东南吴楚坼慎莫脱手踊跃逝去双龙精君不见我家古铁三尺冰粵砥荡磨新发硎不学区区一人敌上为天子匡前星

李公子行

李公子鳳之雏龙之驹面如赭玉盘眼如明月珠舌端吞吐五色锦胸中元有邺侯三万牙签书曩执金陵南端之白简今曳淮吴大府之长裾东维先生在五湖相逢一笑黄公垆我闻公子曾大父先皇开基作刑部马头约法十二章燕都新建尚书府丹书铁券盟山河赫赫勲名照今古又闻尔父司农公画策屯田辟西土岁输百万实太仓功着兵前料量府汝今年少毛骨奇五花骢马当春骑燕王方买台上骏赵客合脱囊中锥姑苏台下春回首东风綠遍官河柳人生离合自有时更劝西门一杯酒李公子尔岂马上杀贼之鏑娄下马喻贼之露书莫负汝祖汝父东鲁为真儒

盲老公

刺拜珠格尔台长也戊戌十月二十三日党海寇用壮士槌杀之穆尔古苏将黄中禽拜住尽戮其家

盲老公侍御史崇台半面呼天子白米红盐十万家凤箫龙管三千指门前养客皆天骄一客解拯千黄苗太阿之柄忽倒掷槌杀义鹞招羣梟一客死百客辱万夫怒一夫独生缚老盲来作俘百口贱良一日戮独遣小娥年十五腰金买身潜出户腰金买身潜出户馱作娼家马郎妇

铜将军

刺伪相张士信也丁未六月六日为龙井炮击死

铜将军无目视有准无耳听有神高沙红帽铁篙子南来开府称藩臣兵强国富结四邻上稟正朔天王尊阿弟柱国秉国钧僭逼大兄称孤君案前大事十袄嬖后宫春艳千花嫔水犀万弩填震泽河丁万锄输茅津神愁鬼愤哭万民铜将军天假手疾雷一击粉碎千金身斩妖蔓拔祸根烈火三日烧碧云铁篙子面缚西向为吴宾

周铁星

刺斂臣周偃也张氏亡国亡于其弟士信趣亡于毒斂臣周偃偃山阳铁冶子以聚

敛功至上卿伏诛日曰钱谷盐铁籍皆在我汝国欲富当勿杀我主者怒曰亡国贼不知死罪尚敢言是耶速杀之吴人快之或手额谢天曰今日天开眼也

周铁星国上卿谈韩申为法经钉捶杖为国刑千仓万库内外盈十有三赋争科名周铁星鞭算箕敛无时停开血河筑血城血战舰血军营刮民膏啖民髓六郡赤骨填乌灵齐云倚天一日倾铁星亡国法当烹尚持六郡金谷数丐死万一充虞衡乌乎周铁星十抽一椎百万钉誓剝尔骸作溺罌铁星碎地启瞠天开顛【盲同】

蔡叶行

刺佞幸臣蔡文叶德张氏亡国由太弟太弟致此实由二佞丁未春二佞伏诛于台城风干其尸于枰刑者一月

君不见伪吴兄弟四六七十年强兵富金谷大兄垂旒不下堂小弟秉钩独当国山阴蔡药师云阳叶星卜朝坐白玉堂夜宿黄金屋文不谈周召武不论颇牧机务托腹心邊筹凭耳目弄臣什什引膝前骨鯁孤孤内囚牯【参军俞斗南也】去年东台杀普化今年南垣杀铁木凤陵斲棺取含珠鲸海刮商劫沉玉粥官随地进妖艳笼货无时满坑谷西风卷地来六郡下破竹朽索不御六马奔腐木那支五楼覆大钺先罪魁余殃尽孛戮寄谢悠悠佞幸儿福不盈眶祸连族何如吴门市卖药卖占饥死心赤足

金盘美人

刺伪驸马潘某也潘娶美娼凡数十内一为苏氏才色兼美醉后寻其罪杀之以金盘荐其首于客宴絶类北齐主事国亡伏诛台城投其首于溷

昨夜金床喜喜荐美人体今日金盘愁愁荐美人头明朝使君在何处溷中人溺血骷髏君不见东山琵琶【弼】琵琶夜夜鬼语啼篁篴

齐主纳娼妇薛氏清河王岳尝因其姊迎之至第帝怒杀其姊薛甚宠于帝久之主忽思其与岳通斩首藏于怀出东山宴饮探其首投于盘支解其尸弄其髀为琵琶复收髀流涕曰佳人难再得载尸出墓帝被髮步哭送之

春晖草

悲甘生钩也钩从予学春秋乡贡成名父死母老乏养不择禄而仕于伪祸连及之与十叅谋同死于髑髅堆云为其母赋春晖草云

宜男花春晖草小草报春晖叶好花亦好花上青蚨缀枝满阿■〈弥上女下〉花开春日短疾风卷地起劲草偃如麻借问春晖草漂蓬落谁家阖闾城外髑髅台阿■〈弥上女下〉些魂台上来宜男草抽花染血花上之血不可灭

题朱莲峰梦遊仙宫殿明日偕见西辨章进凝香阁诗【长短二十句】

青莲老人青佩环自言昨夜梦遊海上天梯山天梯之山三万八千丈琼台双阙开天闕赤藤飞上最絶顶千树琪花散晴影通明前殿上覲玉虚翁左面长眉瞳炯炯玉翁元是太极仙手弄两丸日月旋天扃地户司启闭玄牝一钥开天先青莲老人南极裔泰华开花一千岁大人赋奏马文园玉藕如船浇渴肺殿前作诗明月光光采下彻下土中

书堂明朝写得凝香章蝴蝶飞来七宝床

凝香阁诗【有序 长短二十四句】

凝香阁者光禄大夫平章政事张公辟之以待四方贤士即汉平津侯之东阁也客卿铁崖杨子名之曰凝香本韦苏州语予读杨子记云休兵息民又云厌兵图治引周公仲山甫为辞夫兵不为攻城乃森戟于左右者岂非休兵乎燕寝凝香与贤者共之岂非图治乎周公东征成王迎归天乃反风起禾此休兵效也仲山甫徂齐宣王赖有补袞出纳王命此图治效也杨子之进规者至矣杭庠典教朱庭规敷杨子之记复为歌以颂云

有兵不若森于庭发矢不若藏于棚汗马不若系于营休兵要待民力生平章政事光禄卿阁下万卷清香凝书生香德生馨况复爇鼎相熏蒸绿烟一缕风度棖光禄燕寝寝不惊蝴蝶飞来窥枕屏周公入梦话东征山甫依稀亦言并天既反风禾稼登告以补袞垂鸿名杨子进规为座铭有客如此真贤卿有客如此真贤卿廩人饱粟庖人馈鲭燕昭台上千金轻钱君博士起相庆有如十八学士登蓬瀛

毘陵行【记十月七日事】

孟冬四将发勾吴弯弓誓落双髯颅智谋无过史万叶嫖姚无加李金吾前茅已作破竹刃三覆乃殪含沙狙常山长蛇一断尾即墨怒牯齐犇■〈跽甫〉玉葢孤军呼庚癸皂鸦万甲迷模糊江南长技江北无蒲牢一吼千鲸呼赤杠卓入铁瓮户铁翅横绝丹阳湖捣虚之策不出此赤手可缚生于菟当时上将陷江都至今莫赎千金躯后来飞将慎勿疏襄王城头啼白鸟如何临期易将犯兵忌何必不读孙吴书呜呼临期易将犯兵忌何必不读孙吴书

杵歌七首【见东维子】

杭筑长城赖辨章仁令两郡将美政治于众心以底不日之成然役夫之记有不免凄苦者东维子录其辞为杵歌

亟亟城城城亟成小儿齐唱杵歌声杵歌传作睢阳曲中有哭声能陷城

又

自古众心能作城五方取土不须蒸蒸土作城城可破众心作城城可凭

又

迭迭石石石■〈山敖〉嘈立竿作表齐竿旄阿谁造得云梯子划地过城百尺高

又

罗城一百廿里长东藩恃此作金汤旧基更展三十里莫剩西门一树樟

又

苏州刺史新令好不用西山取石劳拆得凤山杨璉塔南城不日似云高

又

南城不日似云高城脚愁侵八月涛射得潮头向西去钱三铁箭泰山牢

又

攻城不怕齐神武玉璧堪支百万兵不是南朝夸玉璧關西男子是长城

刘节妇

大江东流接混茫金山焦山郁相望铁瓮长城北枕江中有三槐节妇堂壁立万仞之高冈自别母氏归刘郎中朝琼树摧秋霜玉琴不奏双鸳鸯玉笙不吹双凤皇络纬夜啼月上房烛光照泪垂汪汪纺绩给朝莫羣雏忽成行生处同室居死期同穴藏新阡种松三尺强黛色已见叅天长流脂入地成琥珀终夜吐焰如丹光扬雄与冯道不异燕赵倡食君之禄而弗与国同存亡呜呼节妇之德不可量节妇之髮白于雪节妇之心化为铁我歌为继柏舟诗门户他年耀旌节

雉子班

秀女有姊妹被苗师强聘之为妻又遗妹媒而致其姊姊不从赴水絶之妹亦寻死为赋雉子班雉子班

雉子将雏虽两雌麦田青青四月时雉子班班上毛衣网罗一相失误为囹所危吁嗟尔为囹误又忍为我媒【叶】我今谢尔死岂忍须臾迟两雉死同归琴声鼓之为嗟咨英英鷓雌儿百鸟不敢欺只如燕燕傍人飞

黄鹄曲

萧山顾节妇年二十居寡贵要将强婿之顾赋诗自誓改道家装絶之为赋鲁陶婴黄鹄辞

黄鹄双栖今年命有不齐雌将雏兮失其雄飞【叶】虽失雄飞孤自誓【平】岂无他雄兮誓不徙故栖使君兮迷予与孤俾予改图一女可二夫使君事主涂亦殊

翁氏姊

翁氏姊者钱唐人年四十不嫁寇陷钱唐与弟忠一家四人誓结袂死于河姊曰河之死者有秽矣吾独寻干淨水死忠等赴河姊亦不见乃跳城阴古井死

翁氏当乱离投河誓翁媪生为同林鸟死作结缕草翁氏姊投袂赴长河贼杀血污水我胡为河里死莫耶井古城阴下有斗水琉璃深井中古剑剑妾心莫耶夜作蛟龙吟濮州娘

朱鬢氏掠女妇人择白脂者一狎即付汤火熬膏为攻城火药濮州花娘薛氏者濒杀复与裸饮饮婪酣抱花娘卧乘酣睡抽其佩刀刺之遁出驰马抵官兵而遂擒其众吁薛娼妇也而壮节可尚亦乱世奇事为赋濮州娘列古乐府

濮州花娘劝君酒酒中电影红蛇走花娘分死红焰焦五尺肉躯油一斗连床裸饮饮婪醺花娘待罪眠红茵突咽一寸堪匕首夜驰铁骑投官军君不闻始州王氏女拔羌刃杀羌虎濮州花娘刺客才剑气何须大娘舞

处女冢

处女名雪字玉霁余从父女弟也年十三善琴十五攻词翰二十许陈氏子未娶陈歿遂守志不嫁达官聘之不允自誓之死作处女冢兵乱处女闭户饿而死年四十有二

冢在梧桐山先垄侧

杨处女白雪霓慈母惜白雪抱玉真珠擎十三善瑶琴不作濮上音十五弄彤管不作花帽情叮咛媒与妁必嫁公与卿英英马上郎貂帽绣衣裳来交处女币愿作处女郎贮以黄金屋荐以白玉床大珠连理带七宝合欢囊大珠五十万七宝百万镒黄羊尾如扇文鸡若凤皇置酒结高宴长跪起行觞处女誓慈母有死不下堂嗟嗟杨处女处女节独苦事母终母丧母坟成负土白髮五十秋五十终处女誓作处女坟南山华表柱荒城兵火交三月不开户生作独月娥肯作城中三嫁妇

铁崖古乐府补卷六